

कनौजिया काका

कनौजिया काका

उपन्यासकार
डॉ. अमरेन्द्र



ISBN : ९७८.८१.९६१४४६.५.४

प्रथम संस्करण
२०२३

सर्वाधिकार ©
लेखकाधीन

प्रकाशक
अंगिका संसद
सराय, भागलपुर
(बिहार)-८१२ ००२

E-mail : angikasansad@gmail.com

हरियाणा कार्यालय
वार्ड-३३, सेक्टर-२८
सरस्वती विहार, गुरुग्राम-१२२००२

मुद्रक
Das Printer
गोविंदपुरी, दिल्ली।

मूल्य
एक सौ रूपये मात्र

Kanaujiya Kaka (Angika Novel)

Dr. Amrendra

Rs.100/-

अंगिका कला के मर्मज्ञ विद्वान
ज्योतिषचंद्र शर्मा
के स्मृति में
जिनको हृदय में बच्चो-बुतरू लें
एक पनसोखावाला दुनियाँ छेलै!

—अमरेन्द्र

ई उपन्यास लेली

एक दशक से भी पहिलको बात छेकै। हिन्दी आरो पंजाबी के प्रख्यात क्याकार जसवंत सिंह विरदी जी हमरा शांता ग़ोवर के लिखलो एक किताब भेजले छेलै—‘दस गुरु साहिबान’। ऊ किताब पढ़ी के हमसे सोचले छेलियै, हेनो किताब अंगिकाहो में होना चाही। फेनु ई बात ऐलो-गेलो होय गेलै।

कुछ सालो के बाद भागलपुर आकाशवाणी ले हमरा अंगप्रदेश पर धारावारिक रूपक-लेखन ले आमंत्रण मिललै, ते ई प्रदेश के हाथी के विशेष प्रसंग एक खंड में ऐलै। हमरा लगलै—अंगप्रदेश के हाथी पर बच्चा लेली एक पुस्तक होना चाही, ऊ भी अंगिकाहो में। मतर यहू बात मेटाय चललो छेलै कि हठासिये एक समय में दोनो किंछा एक साथ प्रबल होय उठलै। समस्या यहू आवी गेलै कि पहिले ऊ लिखो कि पहिले ई। आखिर में ई बात मनो में ऐलै कि दोनो के मिलाइये के केन्हें नी बच्चा लेली एगो उपन्यास रची देलो जाय। काम कठिन छेलै, मतर काम करनाहै छेलै आरो फेनु १६ सितम्बर २०२२ यानी जितिया पर्व के पहिलो दिन ई उपन्यास के लिखनाहो शुरू करी देलियै। ठीक छठ पर्व के चौथो दिन एकरा पूरो करी देलियै।

आबे ई केन्हो बनलै, ई विद्वाने बतैतै। जो नहियो बाल-उपन्यास बने पारले होतै, तहियो हमरा ई बात ले संतोष छै कि मनो मे जे इच्छा पूरा होय ले सालो से कुदक्का मारी रहलो छेलै, आबे ऊ पालथी मारी के चुप्पे रहतै!

—अमरेन्द्र


सम्पर्क : लाल खां दरगाह लेन

सराय, भागलपुर, बिहार, पिन-८१२००२

मोबाइल :-८३४०६५०६७६, ६६३६४५१३२३

जेठौन एकादशी

४ नवंबर २०२२



कनौजिया काका

कनौजिया काका जाय तें रहलौं छेलै मँहगी महतो कन ही, है जानै लें कि दू दिन बीती चुकलौं छै—आखिर की बात छै कि नै ओकरो तीनो बच्चे तेतरी, पंचु, बंटु हमरो बखारी दिस टुघरलौं छै, नै तें मँहगी महतुवे । कि तभिये हुनी दू बाँस के दूरी पर दू बच्चा कें माँटी कोड़तें देखलकै ।

“अरे ई तेतरी आरो पंचुए छेकै, पड़पड़िया रौदी में ई दोनो माँटी में की खोजी रहलौं छै ?” ई सोचथैं हुनी मलकी कें वहीं ठां पहुँची गेलै आरो कनौजिया काका कें हठासिये अपनों नगीच ठाढ़ों देखी कें तेतरी आरो पंचु स्प्रिंग के पुतला नाँखी एक झटकाहै सें उठी खाड़ों भै गेलै । दोनो नें कुर्ती-कमीज आरो पैंट अपनों-अपनों हाथों सें झाड़ी कें एक्के साथें गोड़ छूवी प्रणाम करलें छेलै । काका ‘खुश रहो, खुश रहों’ कहलें तें जाय रहलौं छेलै मतर हुनकों ध्यान वै दोनो पर नै; सामना के खचुए पर बेसी छेलै । खच्यो के लंबाई-चौड़ाई देखतें हुनका रहलौं नै गेलै, ते हँसतें हुएँ बोललै, “अरे पंचू, तोहें है की करी रहलौं छैं! एत्तें बड़ों एक हाथ के खच्यो कथी लें खोदलें छैं रे! से की ताड़ गाछी के डंटा आरो खजूरी गाछी के गिल्ली बनाय के गिल्ली-डंडा खेलवैं ? कुँवर विजयमल बनै लें चाहै छैं की ? विजयमल वास्तें चालीस मॉन के गिल्ली आरो अस्सी मॉन के डंडा बनवैलौं गेलौं छेलै । है बात जानै छैं की नै ?” आरो ई कही कें कनौजिया काका खिलखिलाय के हँसी पड़लौं छेलै ।

रुकलै, तें हुनकों नजर मँहगी के बेटी तेतरी के दोनो हाथों पर पहिलें पड़लै जे झाड़ला-पोछला के बादो अभियो मटमैले छेलै । आबें हुनकों मुँहों पर हौ हँसी नै छेलै । तेतरी के दोनो हथेली कें अपनों बायाँ हाथ में लेकें दायाँ हाथ सें हौले-हौले झाड़तें कहलकै, “आरो तोहें भाय

के कामों में मदद करी रहलें छैं। एत्ते बड़ों खच्चो पंचू तोरा सें खनवाय लेलकौ। घंटा भरी सें खानतें होभैं। वहू खुरपी-खंती सें नै—है हाथ भरी बाँसों के खपछी सें! तेतरी छेकें नी! तीन भाय के पीठी पर ऐलो छैं—भाय, माय, बाबू सबके वास्तें भगमंती, तें भाय के कामों में मदद केना नै करवैं! कर-कर! तेतेरिये होला के कारणें तें गाँव भरी मानवो करै छौ। जानै छैं; घोर अकालों मे जनमलें छेलौ तोरों बाबू। मँहगी सरंगों पर चढ़ी गेलें छेलै आरो वही मँहगी समय में तोरें बाबू धरती पर ऐलौ, तें तोरें दादी पोता के नामो रखी देलकौ मँहगी। मँहगी के भाग्य बदलना शुरू होलै, तें समझें तोरें जनमे के बाद! तोरें जनमथें तोरें बाबू कें गाँव के पंचायत-भवन के देखरेख वास्तें नौकरियो मिली गेलौ।”

अपनों प्रशंसा सुनी कें तेतरी कटी-टा मुस्कैलै, फेनु कुछ उम्मीदों में काका दिस देखलकै, कि पंचुओ वास्ते हुनी कुछ कहतै मुदा प्रशंसा की करतै; हुनी पंचू के माथा पर हाथ फेरतें कहलकै, “सिधंगड़ी बहिन पैलें छैं, ते खूब खटवाय छैं, तोहें तें मुकुर-मुकुर खाली खच्चो देखी रहलें छेलें, आरो यें बेचारी खपच्ची सें खट्टो खानिये रहलें छै, माँटी निकालिये रहलें छै, तें कथी लें कुछ करना। कटी-टा तोहें अपनों तरत्थी देखैं—केन्हो साफ-सुथरा छौ; जना पनघट साबुन सें धोय के ऐलें रहें। जरा सोचें, जाँ दोनो मिली कें खानतियें, तें एत्ते देरो नै लगतियौ।” कहतें-कहतें काकां खच्चो के नगीच आवी कें हैरत सें पुछलें छेलै, “पहिले ई तें बताव कि एत्ते बड़ो खच्चो खाने के तोरा जरूरते की पड़लौ? तोहें अपनों घुटना के आधों तें खोदवैये लेलें छैं। खच्चो खानी रहलो छैं की पोखर ?”

काकां भले कोय भावों सें कहलें रहें मतर पोखरवाला बात सुनी कें दोनो कें हँसी आवी गेलै। तेतरी तें अपनों मुँहों पर दोनो तरत्थी रखी कें खिलखिलाय पड़लें छेलै, मुदा अपनों गलती बुझी कें पंचू बेसी देर हँसें नै पारलें छेलै आरो छन्है बाद ओकरों चेहरा पर दोषी होय के भावो तनी गेलै, जेकरा भाँपे में काका कें कटियो-टा देरी नै लगलें छेलै। फेनु की छेलै, हुनी झट सना पंचू के दोनो काँखी में अपनों दोनो हाथ डालतें ओकरा उठैलकै आरो बायां कंधा पर बिठाय लेलकै। कंधा पर बैठे भर के देर छेलै कि ओकरों चेहरा गेंदा फूल-रं खिली गेलै। आबें है डेड-बेड़

सैं कुछ तें होन्है छेलै। हुन्नैं काका के कान्हा पर बैठी कें पंचू के गुदगुदैवों आरो हिन्नैं तेतरी के मुँहों सैं खिलखिलाहट के गायब होवों दोनो साथे-साथ होलों छेलै। तें, काका कें जना ई होय के भनक पहिले सैं रहैं, से कहलकै, “तोरों वास्तें एक ठो कंधा खाली छै नी! चल्तों आबें दायं कंधा पर तोहें बैठ” आरो ई कही कें बायं हाथ कें पंचू के पीठ पर रखतें हौले-हौले आधों सैं बेसी ठेहुना बल्लों बैठी गेलै आरो तेतरी कें दायं ठेहुना पर गोड़ रखी कें कंधा पर बैठी जाय के इशारा करलकै। फेनू की छेलै—जेना तेतरी एकरे आसों में रहैं। ऊ झट सना एक दाफी बायं गोड़ के पंजा के धुरदा दायं गोड़ में सटाय कें पोछी लेलें छेलै आरो दायं गोड़ के पंजा के बायं गोड़ से सटाय कें आरो काका के दायं हाथ के सहारा पावी जाँधी पर गोड़ धरतें दायं कंधा के दोनो दिस गोड़ लटकाय बैठी गेलों छेलै।

“दोनो हमरों माथों कें धरनें राखियें। आबें हम्मैं उठै छियौ।” ई कही काकां अपनों हाथ के दोनो पंजा दोनो ठेहुना पर जमैलें छेलै आरो एकदम आहिस्ता-आहिस्ता, बिना कटियो-टा मूड़ी झुकैलें, ठाढ़ों भै गेलों छेलै।

फेनु दोनो के पीठी पर अपनों दोनो हाथ साटलें मंहगी महतो के दुआरी दिस लंबा-लंबा डेग मारलें बढ़ी चललै।

“अच्छा ई तें बताव पंचु, हमरों कंधा पर बैठवों केन्हों लगी रहलों छै ?” काकां दोनो के चुप्पी तोड़ै के ख्यालों सैं पुछलें छेलै मतर पंचु कें समझहै में कुछ नै आवी रहलो छेलै कि एकरो वैं की जवाब देतै कि तभिये तेतरी बोली पड़लै, “हम्मैं कहियौं काका—तोरों कन्हा पर बैठवों केन्हों लगी रहलों छै।”

“हों-हों, तोंही बोल! पंचु तें फेल होय गेलै।”

काका के हों बोलना छेलै कि वै हरखित होतें बोललै, “तोरों कन्हा पर बैठी कें हमरा होने बुझाय रहलों छै; जेना कि तोरा हाथी पर बैठी कें बुझैतें होथों।”

तेतरी के उत्तर सुनी कें कनौजिया काका कें जेना गुदगुदी लगी गेलों रहैं। खिलखिलाय कें हँसी पड़लै। ओकरों जवाब सुनी काका कें हँसतें देखी तेतरियो एत्ते खुश होय गेलै कि वहू खुशी में काका के माथा

पर ताल ठोकें लगलै। ऊ तें पंचु मुँहो पर अंगुरी रखी कें मना करलें छेलै, तें ओकरा अपनों गलती के गियान होलौ छेलै।

काका अभियो भीतर सें गुदगुदाय रहलौ छेलै। फेनु अपनों हँसी पर काबू पैतें बिना तेतरी दिस देखले पुछलें छेलै, “तें, की हमरा तोहें हाथी पर चढ़लौ कभियो देखलें छें ? हममें तें तोरा कभियो नै देखलियौ कि तोहें हमरा देखी रहलौ छें।”

“तोहें कहाँ सें हमरा देखवौ—हाथी की बकरी-छकरी छेकै जे ओकरों लुग पहुँची जइयै। हाथी सें हमरा बड़ी डोर लगै छै, यही सें घरों के झडोखे सें तोरा हाथी पर चढ़लौ देखी लै छियौ—जबें भी पिछवाड़ीवाला बँसबिट्टी सें गुजरै छौ।”

“अच्छा, कभी तोरो मॉन करै छौ कि हममें हाथी पर चढौं ?”

ई बोलना छेलै कि तेतरी हेने नै-नै करै लगलै; जेना ओकरा हाथिये पर चढ़ाय लेली काकां पकड़लें होलौ छै। “काका हमरा नीचे उतारी दा! आबें हममें पैदले घोर चलो जैवौ।” तेतरी बोली पड़लै। ओकरा यहू गियान नै रही गेलौ छेलै कि काका के घोर तें पुवारी टोला मे पड़े छै आरो ओकरों घोर तें पछियारी टोला में छै—जन्ने काका जाय रहलौ छै। दोनो टोलो के बीच तें बीस बाँस के दूरी छै आरो काका के हाथी तें हुनको दुआरी सें बाँस भरी दूरे बरौ गाछों सें बँधलो रहै छै—वहू में खूब मोटों लोहा रों सीकड़ सें। ई सब बात वें अपनो बाबू सें जानलें छै।

मँहगी ओकरा ई बात तबें बतैलें छेलै, जबें वें नद्दी दिस सें ऐते हाथी के चिगघाड़ सुनी एकदम डरलौ-डरलौ बाबू सें पुछलें छेलै, “बाबू, काका के हाथी हिन्नौ तें आवें पारें।” तखनी बेटी कें गोदी में लेतें मँहगी ओकरा बतैलें छेलै, “बेटी, ऊ हिन्नै आवै नै पारें। ऊ तें मोटों सीकड़ सें बँधलौ होतै। सीकड़ तभिये खुलै छै, जखनी कनौजिया काका खोलै छौ।”

तेतरी कें बाबू के बतैलौ बात याद ऐथें पुछलें छेलै, “काका, आय तांय हाथी कभी दौड़ैलें छौ आरो डरों सें घरों में जाय कें नुकैलौ छौ।”

तेतरी के बात सुनी कें काका फेनु हँसलौ छेलै आरो हँसथें-हँसथें

कहलें छेलै, “जो हाथी उमताय जाय आरो केकरो पीछा करें, ते घरे मे नुकैला सें की होयवाला छै। वहू में जबें गामो में सबके घोर माँटिये-फुसों के होय छै। हाथी कें घोर तोडै में कतें देर लगतै! एक बात जानी ले—जों कोय उमतैलों हाथी पिछुआवें, तें घरों में नुकाय जैवों आकि गाछी पर चढ़ला के बदला घरों के बाहर आग जराय देना चाही।”

“तबें तें हाथी के आरो सुझाय पड़तै कि कोन घोर कर्नें छै आरो के कैन ठां नुकैलों आकि कोन दिस भागी रहलो छै” तेतरीं जरा झुकी कें काका के मुँह दिस देखतें बोललै।

“नै-नै, हेनों बात नै छै” एक तें हाथी कें बहुत दूर तांय दिखैवो नै करै छै—फेनु रौशनी में ओकरा आरो कम सुझावें लगै छै।”

“तें, जे जंगले के बीचो में रहै छै, वैं की करतें होतै?” तेतरीं फेनु पुछलकै ।

“वही करै छै। रात होलों, तें दुआरी के बाहर आग जराय कें छोड़ी देलकों आकि सब हाथों में लुक्का लेलें हल्ला करें लगतों। फेनु हाथी कभी नै ऐतों।” काकां बोललें छेलै ।

“ओ, आबें बुझलियै कि हुन्नें परसबन्नी में गन्हौरी काका आरो सिरचन बाबा कैन्हें राती आग जरैनें राखै छै। हमरा तें हमरों टिकली दीदीं यहा बतैलें छेलै कि सिरचन बाबा आरो गन्हौरी काका बड़ी गरीब छै नी, यहा सें राती लकड़िये जराय कें घोर इंजोर करै छै। अच्छा काका, लकड़ी तें तभैं जरैतें होतै, जबें हाथी बस्ती में घुसी जैतै होतै, मतुर लकड़ी जरै में तें बहुत देर लगै छै। तब तांय तें हाथी बस्तिये रौंदी कें चल्लों जैतै।”

“कहलें तें तोहें ठिक्के। यही विपत्ती सें बचै लेली तें जंगलवाला बस्ती के लोग घरों में हेनों गोयठों रखै छै, जेकरा में सुक्खा मिरचाँय भरलों रहै छै। हाथी के भनक लगलों कि वही मिरचाँयवाला गोयठों बस्ती के हिन्नें-हुन्नें जराय देलकों। भला मिरचाँय के गंधवाला धुआँ हाथी बर्दास्त करें पारें। उल्टे पाँव भागी जाय छै।”

काका सें ई बात सुनथैं दोनो एकदम खिलखिलाय कें हँसी पड़लै। हँसी रुकलै, तें तेतरी बोललै, “जंगल के लोगों ई विद्या जरूरे हमरी माय सें सिखलें होतै। मइयो दाली में दै लें जबें पँचफोरन साथें

सुक्खा मिरचाँय पकाय छै, तें हमरासिनी भनसाघोर छोड़ी कें सीधे ऐंगनो भागी जाय छियै।”

तेतरी के बात सुनी कनौजिया काका मुस्कैलों छेलै आरो रुकतें हुएँ ठेहुनों पर पंजा बल्लों चुकुमुकु बैठी गेलों छेलै। काका कें हेना बैठथें देखी दोनो कें चेत होलों छेलै कि ऊ अपनों घरों के दुआरी पर छै। ई देखथें दोनो कान्हा सें हेनों ससरी कें नीचें आवीं गेलै, जेना ससरौआ सें ससरतें रहें।

“कहाँ छें, मँहगी ?” काकां टनकों गल्ला सें बोललों छेलै।

कनौजिया काका के आवाज सुनना छेलै कि मँहगी महतो लपकलों बाहर ऐलै आरो कहलकै, “दादा तोहें! ई दोनो कहाँ मिली गेलों। दुपहरिये निकललों इखनी दिखाय पड़लै। आवों, ऐंगनो आवों नी।” ऐंगनों दिस इशारा करतें मँहगी बोललै।

“इखनी नै। बेरा झुकी रहलों छै। घरो निकलना जरूरी छै। हाथी के खाना-पानी तें हमरै देना रहै छै। हों, एक बात, कल ई दोनो कें हमरा कन लेलें अइयें। हाथी पर नै चढतै, तें नै; नगीच सें देखतै तें।” आरो ई कही काका लंबा डेग मारलें पुवारी टोलों दिस बढ़ी गेलै।

॥ दू॥

अभी फरचों ठीक सें होलो नै छेलै, कि छपरी पर बगरो के चीं-चीं आरो कौआ के काँव-काँव सुनी कें मँहगी महतो खटिया सें उठलै आरो सीधे तेतरी-माय के कोठरी नगीच आवी कें ऐगन्है सें कहलकै, “पंचू आरो नानकी उठलों की नै ? आय कनौजिया दां बुलैनें छै। यहू कहले छै कि पंचु-नानकीयो कें साथ लेलें आना छै। हुएँ पारें हाथी पर चढ़ाय कें गाँव भरी घुमैयो दै। हुनी मौज मे आवै छै, तें केकरो-नै-केकरो हाथी पर घंटा भरी तें घुमैये दै छै।”

“अरे यही डरों सें तें ई दोनो रात भरी की-की नी खुसुर-फुसुर

करते रहलें छै। हों, नानकी हमरों लुग सुटियाय कें सुतै वक्ती कहलें छेलै, ‘माय हमरा काका के यहाँ नै जाना छै। हुनी अपनों हाथी वास्तें सुखैलों मिरचाँयवाला गोयठों रखलें छै—अपनों हाथी कें डराय वास्तें, कि ऊ पगलावें नै। है बात झूठ नै हुएँ पारें। बौसीवाली पर भूत ऐलें छेलै, तें ऊ मंतरिया मिरचेंये जराय कें नी ठीक करै छेलै। हम्में काका कन नै जैवौ—बाबू के कहलौ पर”, एक क्षण रुकतें तेतरी-मांय फेनु कहलें छेलै, ‘आवी कें देखौ नी, दोनो की रं हमरे खटिया पर सुटियैलों बैठलें छैं।”

आरो मँहगी जेन्है कोठरी मे ढुकलै कि तेतरी बोली पड़लै, “बाबू, हम्में काका कन नै जैभौं।”

“से कैन्हें?”

“काकां कहलें छै, हाथी रगैदै छै, तें आदमी के बचना मुश्किल। गाछो पर चढ़ीयो कें बचना मुश्किल छै। होन्हौं कें हमरा गाछी पर थोड़े चढ़ै लें आवै छै।”

“अरे रे, रे, तोरा सिनी कें नै भागना छै, नै गाछी पर चढ़ना छै; खाली देखना छै कि बंटु की रं हाथी पर चढ़ी कें घूमी रहलें छै। बंटू भी तें तोरे सिनी के अपनों भाय छेकौ। ऊ कहाँ डरै छै। कल सँझकी बोललियै, तें तुरत ‘हों’ बोली देलकै आरो एक तोरा दोनो छैं, डरफुक्की-डरफुक्का। उठों तेतरी-माय, तीनो कें तैयार करवावों। आबें जैवै करवै, तें काका के भोरकों कामों में कुछ मददो करी देवै। घरों के काम फेनु पंचायत भवनो के काम। काम करतें आठ साल के बडों दिन कतें खाँटों होय जाय छै हुब-सना ऐलें आरो हुब-सना गेलों।” एतना कहतें मँहगी ऐंगनो सें बाहर निकली गेलै।

घंटा भरी बाद जबें ऊ तीनो बेटा-बेटी कें लैकें पुबारी टोलों वास्तें घरों सें निकललै, तें रस्ता भरी तीनो कें समझैतें गेलै, “तोहें हाथी देखै में डरै छै आरो हम्में तें यहा सुनलें छियै, काका जखनी बीस सालों के होतै नी, तखनिये हुनी हाथी पर चढ़ी कें लाहौर देखै लें दिल्ली जातरा पर निकली गेलें छेलै। लाहौर बुझै छैं यानी पाकिस्तान। तखनी तें पाकिस्तानो अपने देशों में नी छेलै।”

“है बात की सच छेकै बाबू!” तेतरिं आँख फाड़ी-फाड़ी कें

मँहगी दिस देखलें छेलै।

“आरो नै तें की हम्मे झूठ कही रहलौं खियौ। चल नी तोहें अपने सें पूछी लियें।”

मँहगी देखलकै ओकरों बातों सें ओकरों डोर जेना कुछ-कुछ गायब होय गेलों रहें केन्हें कि एकरों पहिलें ओकरों जे गोड़ एकदम छोटों-छोटों उठी रहलौं छेलै—वही मलकी-मलकी आगू बढ़ें लगलौं छेलै।

जखनी मँहगी महतो कनौजिया काका के सीधे हथसार पहुंचलौं छेलै, तखनी हुनी मुलायमवाला नारियल के छिलका सें हाथी के देह-हाथ हौले-हौले रगडवो करी रहलौं छेलै। मँहगी आरो तीनो बच्चा पर नजर पड़लै, तें तेतरी कें देखतें बोललै, “देखें, केन्हों मजा सें देह-हाथ धोलवाय रहलौं छै। तोरा सिनी कें नहवाय में तें माय के नाको दम करवाय देतें होवें।”

काका के बात सुनलकै, तें तेतरी मुस्कैतें हुए पंचु आरो बंटु दिस देखलकै—जना ईशारे-ईशारा में कहतें रहें—हमरा सें बेसी तें तोरा दोनो माय नहवावे वक्ती परेशान करै छें।” बात के बुझतें हुए पंचु नें अपनों ठोरों पर तर्जनीवाला औंगुरी कें रखतें चुप्पे रहै के इशारा करलें छेलै।

जबें हाथी के देह, गोड़, सूँढ़ रगड़ला के बाद बाल्टी-बाल्टी पानी सें हाथी कें नहवैलें छेलै, तें काका तीनो बच्चा कें नगीच आवी कें कुर्सी पर बैठी रहलै। मँहगी तें बुतरू समेत पहिले बाँस भरी दूरी पर मड़ैया के नीचे बिछेलौं चौकी पर काका के इशारा पावी जमी चुकलौं छेलै।

“दादा” कुर्सी पर काका के बैठना छेलै कि मँहगी बोललै “एकरा सिनी कें आचरज लगै छै कि तोहें यही हाथी पर बैठी कें लखनऊ-अजोध्या तांय चल्लौं गेलौं छेलौ। आबें तौही बताय दौ, कि हम्में झूठ बोललियै कि सच ?”

“की पुरनका बात याद दिलाय देल्लैं। झूठ कहाँ बोललै, मँहगी? तखनी तोरों उमिरे होतें होथौ दस बरस आरो हम्में छेलियै बीस सालों के। तोरा याद होतौ, एक सरदार साधु अपनों भगवती थानो में महीना भरी लें ठहरलौं छेलै। गाँव के लोगो सें जे मिली गेलों, वही में संतुष्ट। मतर केकरो दुआरी पर सुतवों-बैठवों नै। हुनकै सें हम्में नानक बाबा के बारे में सुनलें छेलियै। खाली नानक बाबा के बारे मे ही नै, गुरु अंगद

देव, गुरु अमर दास, गुरु रामदास, गुरु अर्जुन देव, गुरु हरगोविन्द, गुरु हरिराय, गुरु हरिकृष्ण, गुरु तेग बहादुर आरु गुरु गोविन्द सिंह जी के बारे में भी एक से एक कहानी सुनलियै। रोज सँझकी वक्ती हुनको लुग बैठी जइयै। मँगनी में अमृत मिलें, तें के छोड़ें! आरु देखें, हो सब कहानी सुनै के असर। सोची लेलियै सब गुरु के जन्मस्थान जाय के देखना छै। आशीर्वाद लेना छै। जवानी के हूब छेलै आरु हाथी तें बापों के किनलों छेवे करलै। सोची लेलियै हाथिये पर चढ़ीकें नानक बाबा के जन्मस्थान तक हो ऐवै मतलब कि आयकों पाकिस्तान के लाहौर तांय।”

कि तखनिये सँढ़ उठाय कें हाथी शंखों के भारी आवाजे नाँखी आवाज देलकै, जे सुनी कें पंचु, बंटु और तेतरी डर के मारे एक दोसरा सें सट्टी गेलै।

“अरे, अरे, डर के कोय बात नै छै। नहैलकै नीं, आबें एकरा कुछ खाना चाहियो; वही बताय रहलौ छै। अभी तुरत आवै छियै, जरा एकरों मुँहों में हाथीभोग तें राखी दियै” आरु ई कही काका वैठा सें उठलै। नगीचे में बनलों एक छोटों रं कोठरी में झुकी कें ढुकलै आरु दोनो हाथों में गोबर के बड़ों लादों हेनों कुछ लैके हाथी लुग ठाढ़ों होय गेलै। काका के नगीच आना छेलै कि हाथी अपनों सँढ़ ऊपर करलकै तें काकां ऊ गोला ओकरो सुरंग नाँखी मुँहों में रखी देलें छेलै, फेनु बगले में रखलों बाल्टी में हाथ धोय कें वहा कुर्सी पर आवी कें बैठी रहलै।

“काका हाथी के मुँहों में गोबर राखलौ की ? की हाथी गोबर खाय छै ?” तेतरीं पुछलें छेलै।

“अरे पगली, हाथी के भोजन कें गोबर के लादों कहै छें। जानै छें, जेकरा तोहें गोबर के लादों बुझी रहलौ छें—वैमें की-की छै; चौर, भूसों, पकलो केला, साथे पीपर के पत्ता, घास, बेसन, गूड़, आरनी सें बनैलों हाथीभोग छेलै, जे एक्के दाफी में गटकी कें केन्हों मस्त होय गेलों छै। आबें कुछ देर हेन्है कें मस्ती में सँढ़ हिलतें रहतै।”

“तें, एत्तें बड़ों हाथीभोग खेला के बादो एकरा भूख लगी जैतै?”

“आरो नै तें की? तोहें छों सालो के छें। दस सेर सें तोरों वजन कम नै होतौ आरु हाथी के वजन जानै छें कत्तें छै ? छों हजार किलो सें

कम नै होतै। ई दिन भरी में सोलह-अठारह घंटा खैतें रहै छै आरो जानै छैं; कुल मिलाय कें कै सेर पत्ता आकि हाथीभोग खाय जाय छै—दू सौ किलो सें बेसी। एक किलो एक सेर सें होवै करै छै, कत्तें कम; बस जरे टा वजन में कम होय छै ।”

“बाप रे बाप !” पंचु के मुंहों सें निकललै।

“बाप रे बाप, की! देखै नै छै एकरों पेट!”

“तें पेटों में रखतें होतै कहाँ?” बंटु जिज्ञासा सें पुछलकै।

“तें, दिन भरी हगतो होतै होने ?” पंचु बोललै, तें तेतरी मुँह पर दोनो हाथ रखी कें हंसलै, वही नै, एक दाफी सब हँसी पड़लै मतुर अपनों हँसी कें तुरत्ते रोकतें काका बोललै, “बोलै छैं तें ठिके। आरो जानै छैं, यें कत्तें पानी पीयै छै, पचास लीटर सें बेसीये। आबें तें ई बुढ़ाय चललै। सत्तर साल सें कम नै होतें होतै।”

“कैन्हें नी होतें होतै ! तोरे तें अस्सी सें बेसी होय चलो होथों दादा!” मँहगी महतों कहलकै।

“गलत नै बोललैं। जखनी एकरा पूर्णिया मेला सें कीनी कें बाबू आनलें छेलै, तखनी ई पाँच साल के होतै आरो तखनी हमरों उमिर पनरों साल के होय रहलें होतै आरो तहिये सें ई हमरों साथ छै। हमरों एक-एक इशारा कें यें समझै छै आरो हममें एकरों एक-एक बोली कें। पहिलें नकुल बाबा के महावतें हमरा एकरों साथ बोलै, व्यवहार करै के तरीका बतैलें छेलै, फेनु तें जल्दिये सब कुछ सीखी लेलियै। देखैं, सूँढ़ उठैलकै आरो ई रं सूँढ़ उठाय के मतलब छेकै—पानी माँगी रहलें छै” तें काका वहाँ सें उठीकें कुइयां लुग गेलों छेलै आरो एक कूड़ पानी खीची कें कूड़ ओकरों आगू करी देलकै।

सबके आँख हाथिये पर जमलें होलें छेलै। जखनी वें सूँढ़ कें कूड़ सें बाहर निकाललें छेलै, तें काकां खाली कूड़ कें तेतरी-पंचु आरनी दिस देखै लें करी देलें छेलै। देखना छेलै कि तेतरी के मुँहों सें निकललै, “बाप रे, सब पीवी गेलै, एक्के सुरे!”

काकां फेनु कुरसी पर आवी के बैठी गेलै। बंटु बोललै, “बाप रे बाप! काका, हाथी एत्तें पानी पीयै छै?”

“दिन भरी में पैतालीस सें पचास लीटर तांय पानी पीवी जाय

छैं, हों। गर्मी दिनों में लगभग दुगना।”

सुनी कें तेतरीं बंटू दिस एक दाफी देखतें काका सें कहलकै, “मतर बंटु तें गर्मियो दिन में छोटकुनिया गिलासों सें चार दाफी पीवी लै, तें यही बहुत।”

“यही सें तें एतें रोगी हेनों दिखाय पड़ै छै, एकदम सुस्त। पानी तें छोटों-छोटों जीव-जंतु सें लैकें हाथी हेनों जानवरो वास्तें जरूरी छै; तभिये तें भगवाने घरती के तीन हिस्सा कें पानिये सें भरी देले छै कि जीव कें पानी के कभी कमीये नै हुएँ।”

“काका, हौ देखौ, बिल्लैया-बच्चा हाथी के आगू सें निकली रहलौ छै—ओकरा मारिये देतै।” तेतरी के ध्यान हठासिये बिल्ली-बच्चा दिस चल्लौ गेलौ छेलै।

“नै नी मारतै। हाथी एकदम शाकाहारी जानवर होय छै। बाँस खेलकों, महुआ खेलकों, गहुम खेलकों; भला हेनों शाकाहारी जीव कें बेकार के गोस्सा कहाँ सें होतै; ओकरो में पालतू हाथी कें तें आरो नै। खाय के तें जंगलियो हाथी यहा सब खाय छै, मतर जंगली हाथी के ताकत ई पालतू हाथी सें कहीं बेसी होय छै। बंधलौ-खुल्ला हाथी में तें अंतर होवे नी करै छै। तबें हाथी तें हाथिये होय छै, बंधलौ पालतू रहें कि जंगली। धरती पर एकरा से बरियो आरो कोय जानवर नै होय छै।”

“जबें हेनों बात छै, काका, तें ऊ हाथी के गोड पकड़ी कें घडियालें पानी में केना खीचें लगलौ छेलै, जेकरा विष्णु भगवाने बचैलें छेलै?” तेतरीं काका दिस होते बोललौ छेलै।

“तोहें ई कहानी केकरा से सुनलें?”

“माय सें।”

“पहिले तें ई जानी ले कि हाथी के गोड़ घडियालें नै, मगरमच्छें पकड़लें छेलै। ‘सात समुन्दर, तेरह नदी’ किताब नै पढलें छैं। पढ़तियें तें जानतियें कि माँसाहारी घडियाल नै, मगरमच्छ होय छै। दोनो देखओ में अलग किसिम के होय छै। तें, बात ई छेकै बेटी कि मगरमच्छ पानी में रहैवाला ताकतवर जीव छेकै, जेकरो मुकाबला करना मुश्किल आरो हाथी जमीन पर रहेवाला जीव छेकै, जेकरो शरीर आरो ताकत के मुकाबला आरो जीव की, सिंहो नै करें पारें, जे जंगल के राजा कहाय छै। तें, बात

रहलै मगरमच्छ आरो हाथी के। एक तें हमरा नै लगै छै कि वैं हाथी के गोड़ धरी कें खिंचतें होतै। एक गोड़ धरतिथै, तें हाथी दोसरो गोड़ सें रौंदी देतिथै। हाथी ताकत के नगीच ओकरो ताकते की! हों मगरमच्छ हाथी के सूँढ़ जबें पकड़ी लै छै, तें हाथी एकदम विचलित होय उठै छै। तभियो हाथी ओकरो एकदम्मे वशों में होय जाय छै, हेनो बात नै छै। हाथी सूँढ़ सें ओकरा ऊपर उठाय कें पटकी-पटकी मारी दिऐं पारें। जमीनों तांय खींची कें लातों सें कुचली कें मारी दै छै। मतर कै दाफी हेनों होय छै कि हेनों लड़ाय में हाथी कें अपनों सूँड़ गंवाय लें पड़ी जाय छै आरो घाव नै छुटलों, तें हाथी मरौ पारें। आरो एक बात जानी लें, हाथी के जत्तें बड़ों माथों देखै छै नीं, ओत्तें ओकरो बुद्धियो बड़ों। कोय बात एकरा याद खूब रहै छै। जों कोय मगरमच्छ एकरा चोट पहुँचैलकों, तें मौका देखी कें हाथी बिना ओकरो जान लेलें नै छोड़ै।”

“काका, तोहें जॉन जंगली हाथी के बात करलौ, तबें तें ओकरो ताकते रं ओकरो दाँतो आरो बड़ों-बड़ों होतें होतै? नाना तें हेने कहलें छेलै।” तेतरी के जिज्ञासा बढले जाय रहलौ छेलै।

“होतिथै तें एकरो, जों ई नर हाथी होतिथै। बड़ों-बड़ों दाँत खाली नर हाथिये के होय छै। मेदी के छोटों-छोटों—जेहनों एकरों छै।”

“तें, तोहें नर हाथी कैन्हें नी पोसलौ ?”

“पोस मानै छै, तें मेदिये हाथी नी; यही सें। घरों में देखतें होभैं, बाबू तें कभियो-कदाव गोस्सैवो करतें होथों मतर मांय तें हमेशे दुलारे करतें होतौ।”

काका के ई बातों पर तेतरी कुछ नै बोललौ छेलै, नै आगु कुछ पुछलें छेलै। ई देखी कें काका मँहगी सें बोललै “मँहगी, मालदों आम तोड़ी कें रखलें छियै। पकलों-पकलों आठ-दस ठो, लै लियें आरो जब तांय छै, रोजे लै जइयें। घरों में खैयेवाला के छै। दू पूत छेलै—कोय अमेरिका, कोय इंगलैंड। मूर्खें रखतिथै, तें अच्छा। अपने हाथों घोर उजाडलें छियै, तें देवों के की दोख दियै। रोजे बच्चा-बुतरु कें भोरे-भोर लै आनलों कर—जब तांय मालदों गाछी में आम छै।”

काका के बात सुनी मँगनी कुछ मनझमान होलै, तें काका फेनु कहलकै, अरे बैठलों की छैं। बच्चो सिनी कें ऐंगनों लै जो। पुबारी कोठरी

में आम पालों पर रखलें होथौ । हम्मं चललियौ—जरा डुबकी कें नदी दिस घुमाय ऐश्यै...की डुबकी घुमै लें चलवें?” काकां अपनों हाथ कें इशारा करतें पुछलकै, तें हाथियो सूँढ़ उठाय के शंख नाँखी आवाज करलकै ।

“देखैं, हों बोललै । जो, आम लइये कें जइयें आरो यहा वक्ती कल यहाँ आवी जाना छै—की तेतरी” तेतरी के माथा पर काकां हाथ रखतें कहलें छेलै ।

“एकदम काका । अभी तोहें बतैलौ कहाँ कि हाथिये पर बैठी कें अजोधा केना पहुँची गेलौ? कतें दिन लगलौं? जंगल में डोर लगलौं, की नै लागलौं ?”

“सब बतैवौ बेटी, सब । एकेक करी कें । दस दिनों के कहानी छेकै आरो अभी दस रोज गाछी में आमो रहतै । की पंचु-बंटू, केन्हों रहतै?” काका के ई बात सुनी कें तीनों के चेहरा पर मुरकान फैली गेलों छेलै ।

आरो फेनु सब्भैं देखलकै—काका हाथी के सूँढ़ के नगीच पहुँची गेलों छेलै । कुछ बोललौं छेलै, तें हाथियो साँपो के फन नाँखी सूँढ़ उठाय लेलें छेलै, जेकरै पर गोड़ धरतें काका ओकरो गल्ला में पड़लौं मोटों जंजीर कें पकड़ी लेलकै आरो हाथी के गर्दन पर, हाथिये मुँह दिस मुँह करी, बैठी रहलौं छेलै । पंचु आरो बंटु ई सब देखीकें एकदम दंग छेलै, मतर तेतरी ठाढ़ों होयकें काका के ई विजय पर तब तांय खूब थाली पिटलें छेलै, जब तांय हाथी देखथैं-देखथैं आँखीं सें ओझल नै होय गेलों छेलै ।

॥ तीन ॥

“बाबू, जैवौ नै काका कन ? कबूतर सिनी भाँड़ी में गुटरें लगलौं छै आरो बरों गाछी पर बगरओ सिनी ।” तेतरी के बोली सुनी कें मँहगी

एकदम खुश होते बोललै, “एकदम जाना छै। वहाँ से लौटे में कुछ अबेरो होय जैतै, तें की हरजा। मुखिया जी के कही देवै—नू सिनी के लैके दादा कन जाय छियै। जो, तोहें तैयार होय जो आरो पंचु-बंटुओ के कही दें, तैयार होय लें।”

चारो आय जल्दिये काका-घोर पहुँची गेलों छेलै कैन्हें कि आय तीनो लगभग दौडले जाय रहलौ छेलै आरो ओकरा सिनी के साथ चलै में मँहगी के लम्मा-लम्मा डेग मारै लें पड़लौ छेलै।

तेतरी, पंचु आरो बंटू के देखथें काका बोललै, “आवे, आवें, मैना, सुग्गा, कबूतर! तोरे तें इंतजारी में छेलां। यही से आय पहिले डुबकी के नहवाय देलें छियै, खिलाइयो देलें छियै। सब किसिम से निश्चिन्त। जमी के बैठ आरो जे-जे पुछना छौ—पूछ!”

“काका, तोहें कल कहलौ कि हाथी मगरमच्छो से बेसी बरियो होय छै, तें की, ई बाघो-सिंह से बेसी बरियो होय छै ?” सबसे पहिले तेतरीये थोड़ो आगू खिसकी के बोललौ छेलै।

“आरो नै तें की। कलके बात तें छेकै—अपनों बिहारो के पश्चिमी चम्पारण के बगहा गाँव केरों बात। बीस-पच्चीस रोजों में सातो-आठ आदमी के बाघें मारी देलकै, तें सरकार के आदेश भेलै कि बाघों के मारी देलौ जाय, तें हाथिये पर चढ़ी के बाघों के पीछा करलौ गेलै आरो बाघ मारलौ गेलै। बाघ-सिंह हाथी के बच्चा के नोचें-भमोरें पारें, हाथी के नै। वहू हथनी या हाथी के रहतें की मजाल कि बाघ-सिंघे हाथी-बच्चा के छुवियो लें। अफ्रीकी हाथी तें हेनौ बरियो होय छै कि भैंसो तांय के सूढ़ो से उठाय के पटकें पारें। अफ्रीकी हाथी के दाँतो डेड़-डेड़ हाथों से कम नै होय छै—बेसियो होतें होतें, तें आचरज नै।”

“तबें तें ऊ आरो विशाल होतें होतें ?” पंचु पुछलें छेलै।

“यैमें की की शक। कानो होने बड़ों-बड़ों।” काका दोनों पंजा अपनों दोनो कानों से साटलें कहलें छेलै।

“अच्छा काका, कल तोहें बोली रहलौ छेलौ कि हाथिये पर चढ़ी के पाकिस्तान दिस निकली गेलौ, तें कै दिनों में गेलौ आरो कोन दैके गेलौ, रस्ता में की-की देखलौ ?” बंटु, जे अब तांय चुप्पे छेलै—बोललै।

“यहा सब तें सुनाय लें आय तोरा सिनी के बोललें छियौ। तें

आबें तोरा सिनी जाँघ जोड़ी के बैठी जो। हमरा जतना-टा जेना-जेना याद पड़लौ जैतौं, सुनैलौं जैभौ। तखनी देश के आजादी मिललौं कम-से-कम पाँच साल बीती चुकलौं छेलै आरो हमरों उमिरे की होतें होतै—बीस साल के जरुरे होवै। हौ जेठ-बैशाखों के समय छेलै। हेनाकेँ समझें कि घोर तिकखो रौदों के समय छेलै, जबें हम्में डुबकी के गर्दन पर बैठी, दिल्ली वास्तें निकली गेलियै।”

“हाथी पर सेँ की पाकिस्तान तुरते पहुँची जाय छै?”

“से बात नै। तखनी है रं ट्रेन-मोटर थोड़े चलै छेलै। देश रहौ कि परदेश—लोग या तें हाथी-घोड़ा पर यात्रा करै, नै तें पैदले-पैदल।”

“आदमी ओत्ते दूर की पैदले जावें पारें?”

“जैवे करै छेलै। पतिचैवें, तोरों दादा पैदले गंगा सागर चल्लों गेलों छेलौ। हों, वहाँ पहुंचौ में महीना भरी तें लगिये गेलों छेलै।”

“काका, की सागरो में गंगा होय छै?” तेतरीं आचरज सेँ पुछलकै।

“नै मैना, जहाँ गंगा सागर में मिलै छै—वही जग्घों केँ गंगासागर कहै छै।”

“ओ!” कही के ऊ चुप होय गेलों छेलै।

“तें, हम्में लाहौर पहुँचैवाला बात बताय रहलौं छेलियौ। पहिले तें हम्में बरारीवाला गंगा पार करलियै।”

“तखनी की गंगा एकदम सुखलौं छेलै?”

“नै, कम-से-कम ढाई मरद पानी तखनियो गंगा में छेलै। तखनी की आयके-रं गंगा सुखै छेलै। इखनी तें जन्नें देखों, हुन्नै छाड़न, हुन्नै मरगांग।”

“तें एत्तें पानी में डुबकी डुबलै नै?”

“अरे, हाथी केँ तोहें अपनों मटुकिया काका सेँ कम बुझै छें। जेना मटुकिया काका चानन के बोहों में तैरी केँ पार होय जाय छेलौ नी; होन्है केँ हाथियो तैरी केँ पार होय जाय छै। हाथी तें सौनो-भादो के गंगा पार करें पारें—ऊ ते जेठे-बैशाख के महिना छेलै। तखनी तें होन्हौ केँ गंगा आधो रही जाय छै। बस यहा समझें, कि जना बत्तख गर्दन उठैलें, की रं तैरतें पोखर पार करी जाय छै; होन्है केँ ई डुबकी भी सूँड़ उठैलें

गंगा में हेली गेलै।”

“तें, तोरा डोर नै लगलौं?”

“अरे पंचु, हम्मों तें हाथी के हौदा पर बैठलौं छेलियै, जे पानीवाला छोटों हौदे—रं बनलौं छेलै। महावत तें नकुल बाबा के महावत छेलै। नै तें ओत्ते दूर की जावें पारतियै।”

“तबें की होलै?”

“तबें सीधे हाथी के पूर्णिया जायवाला रस्ता पर करी देलौं गेलै। जाना तें छेलै फारबिसगंज, मतुर रस्ताहै में पहिलें कटिहार आवै छै आरो वहाँ रुकना जरूरिये छेलै।”

“से कैन्हें?”

“जबें दस गुरु के जन्मस्थान देखे लें निकललौं छेलियै, ते कटिहार के बरारी केना नै पहुंचतियै।”

“से कैन्हें काका?”

“तें सुन, सिक्ख पंथ के पहिलों गुरु गुरु नानक देव जबें पंजाब से आसाम जाय रहलौं छेलै, तें कटिहारे के बरारी खंडों में रहलौं छेलै, तद्धैं आसाम दिस निकललौं छेलै। आबें सिक्ख पंथ के नौमों गुरु, गुरु तेगबहादुर सिंह जी के ही ले, तें पंजाब जाय के क्रम में मुंगेर-भागलपुर होलें यहा कटिहारे में कै दिन रुकलौं छेलै। फेनु दसमो गुरु, गुरु गोविन्द सिंह लेली अंग के ई खंड कत्तें पवित्र छेलै, ऊ तें यही बातों से समझें पारें कि हाथों के लिखलौं हुकुमनामा यहाँ भेजलें छेलै, जे हुकुमनामा केन्हौ के गंगा में गिरी पड़लौं छेलै। आबें देखें चमत्कार; हौ किताब कै महीना तांय गंगाहै के नीचें रहलै आरो जबे पानी कम होलै, तें ऊ किताबो निकललै मतर किताबों में कहीं कोय गड़बड़ी नै छेलै। गुरु गोविन्द जी के एक प्रमुख पंक्ति छेकै, ‘जय अंगाली जय बंगाली’।”

“बंगाली तें बुझी गेलियै; ई जय अंगाली की होलै, काका?”

“अपनों ई जे भागलपुर छेकै नी, तखनी अंग कहावै छेलै। बंगाल के सीमा के छूतें हुएँ नेपाल के सीमा के छूतें अंग क्षेत्र छेलै। ई अभियो होने छै। यही अंगप्रदेश छेकै—जेकरों महिमा वास्ते गुरु जी जय अंगाली बोललौं छै।”

“ओ। आबें बुझलियै।” तेतरी बोललै।

“तें हेनों सब गुरु के गोड़ो सें पवित्र होलों घरती पर माथों टेकना तें जरूरिये नी छेलै, मैना। हाथी के दूरे बान्ही कें हम्मैं आरो महावत काका घंटा भरी वही तीर्थस्थान पर तिरफेकन देतें रहलौं छेलिये—तभिये फारबिसगंज दिस निकललौं छेलियै।”

“फारबिसगंज कहाँ छै, काका?”

“पूर्णियै में। जंगल रौं जिला कहौं। भर रस्ता जंगले-जंगल। तखनी अपना यैठां गर्मी के तू छेलै, तें पूर्णिया में ठंडा-ठंडा हवा। बड़ी सुन्दर जगह छै, पूर्णिया। बस नेपाल सें सटले बुझें।

“काका, दादी बोलै छै कि सब नामों के पीछू कोय-नें-कोय कारण होय छै, ते पूर्णिया नाम के पिछुवो कोय कारण होतै?” तेतरी बिना रुकले पुछलें छेलै।

“कहैलियौ नी। पूरा पूर्णिया जंगले सें भरलौं। अरण्य मानी जंगल, तें पूरे जंगलवाला इलाका—पूर्णिया।”

“ओ!”

“जाय के तें मौन नेपालो छेलै। सटले तें छै, मतर ध्यान में वहा लाहौर आरो ननकाना साहब छेलै, से फारबिसगंज सें सीधे मुजफ्फरपुर दिस महावत काकां हाथी कें घुमाय देलकै।”

“ई मुजफ्फरपुर कहाँ छै, काका?”

“एत्तें रही-रही कें टोकवे, तें जिनगी भर पंजाब नै पहुँचें पारवे। ई मुजफ्फरपुर अपने बिहारों में छै—पछियें दिशा में।.... अरे रुक-रुक, मुजफ्फरपुर के बातों पर हमरा लीची के ख्याल आवी गेलै। आय तोरों सिनी वास्तें पकलों आमों के साथ-साथ लीची तोड़ी कें राखलें छियौ।”

“से की मुजफ्फरपुर के लीची यहाँकरो गाछी सें बढियाँ होय छै?” बंटु पुछलें छेलै।

“वही अंतर होय छै, जे पकलों मालदों आरो बीजू आम में होय छै।” कही कें कनौजिया काका हँसलौं छेलै आरो घोर जाय कें गमछी में पचासो ठो लीची लै आनलें छेलै। कहलें छेलै “खाय कें देखैं तें पता लगतौ, की अंतर छै—यहाँकरो, वहाँकरो में। विदेश तांय मुकाबला नै करें पारें मुजफ्फरपुर के लीची के। वही सें कलम लानी कें यहां लगैनें छेलियै।”

फेनु मँहगी दिस देखतें बोललॉं छेलै, “आबें आगू के कहानी आय यही तांय । कल हमरा सिनी सीधे दिल्ली पहुँचै के कोशिश करवै; नै तें महीना भरी रस्ताहै में झुलतें रही जैवै । गमछी में सबटा लीची समेटी ले आरो है पाँच ठो आमो रखीं ले । आबें डुबकी कें हाथीभोगो दैके समय होय चललॉं छै । ओकरो खानाओ बनाय में ढेर समय लगी जाय छै नी ।” ई कही कें काका उठलै, ते मँहगीयो अपनों गमछी के एक छोरों में लीची आरो दोसरो छोरों में आम बान्ही कें तेतरी, पंचु, बंटु के उठै के इशारा करलकै, । इशारा पैथें तीनो उठलै आरो बाबू के घोर पहुँचै के पहिले दरबन मारतें घोर पहुंची गेलों छेलै ।

॥ चार ॥

कनौजिया काकां पूरब दिस के सरंग देखलकै । भगवान दू बाँस ऊपर चढ़ी ऐलॉं छेलै आरो अभी तांय नै ते तेतरी, पंचु, बंटु के पता छेलै, नै तें मँहगीये के । आखिर की बात हुए पारें—काकां मनेमन सोचलें छेलै, तें उत्तरो निकालै में हुनका देरी नै लगलै—जरुरे मँहगी के कनियैनी आवै सें मना करलें होतै । कहलें होतै—रोजे-रोज वहाँ जाय छौ आरो एत्तें-एत्तें आम-लीची उठाय लानै छो । भला काकां मनो में की सोचतें होतै । खाली बच्चा जैतियै, तें वहीं हुनी खिलाय-उलाय देतियै । तोहें जाय छों तें.... बस मँहगी सोचलें होतै—तेतरी-माय ठिक्के कहै छै आरो ऊ नै ऐलै । ऊ नै ऐलै, तें बच्चो-बुतरूओ गायब । आबें हमरे जाय कें बोलाय लें लगें—आरो ई सोचथें काकां कंधा से नीचें ससरी ऐलॉं जनेऊ कें ठीक सें सड़ियैलकै; गंजी ऊपर खादी के अधकट्टी बांहीवाला गंजी चढ़ैलकै; कंधा पर खदरवाला गमछी रखलकै; फेनु हाथों में कोय चीजों सें भरलॉं एकटा झोलियो आरो खड़ाऊँ पिन्ही मँहगी के घोर दिस चली देलकै ।

हुनी मँहगी-घरों सें अभी दू गज दूरे होतै कि मँहगी ऐगन्है सें हुनको खड़ाऊँ के चटचट आवाज सुनलकै आरो तेतरी-माय दिस होतें

बोललै, “आरो जाय लें रोकों, दादा आपने आवी गेलै” आरो ई कहतें सीधे दुआरी दिस झपटी पड़लै।

मँहगी के बाहर निकलना छेलै कि तेतरी-माँय झट सना ऐंगना में खटोली पारी देलकै आरो नीचे में ताड़ों पत्ता के एक ठो चटैयो।

“काका खकसतें-खकसतें ऐंगनों ऐलों छेलै आरो खटोली कें अपनों दिस खींची बैठतें हुएँ बोललौं छेलै, “मँहगी तोरा तेतरी-मायं हमरा कन जाय लें मना करलकौ, ते तोहूँ मानी लेलें ताकि हमरों दस-पाँच ठो लीची-आम बची जाय। यही नी ? आरो है नै सोचलें कि तेतरी, पंचु, बंटु हमरों लुग आवै छै, तें ओकरा सिनी सें गप-सप करी कें हम्मैं तीन लोकों के सुख पावी लै छियै। ऊ सुख के सामना तें हमरों लें तीन देवता के वरदानो फीका छै। कहाँ छै ऊ सब ? आय हमरो यहीं घंटा भरी के, समय बिततै, यहा बुझें। अरे बच्चा-बुतरू कें दू-चार टा फॉल दै दै छियै, तें कोन चौखंडी दै दै छियै! आबें भूलों सें हेनों नै करियैं।” फेनु झोली मँहगी के हाथों में थमैतें बोललै “कहाँ छै मैना-सुग्गा सिनी ?”

तें, मँहगी एक दिस इशारा करी देलकै। काकां देखलकै, तीनो एक चटाय पर बैठलौं कुछु-कुछु कही-सुनाय रहलौं छै। हुनी खटिया उठैलकै आरो वहीं पर बिछाय कें बैठी रहलै। काका के देखना छेलै कि तीनो खुशी सें गनगनाय उठलै—“काका ऐलै, काका ऐलै” कही-कही कें।

“की गपशप होय रहलौं छेलै?” काकों खुश होतें पुछलकै।

“काका, पंचु कही रहलौं छेलै कि पूरा अरण्य पुरैनियाँ केना कें बनी जैतै। एतें कहीं नाम बदलै छै, तें हम्मे कहलियै, ई केना नै हुएँ पारें गाँमों के पुरहैत काका के बेटा के नाम दृढव्रत छेकै, ते गाँववाला ओकरा डेडबितना केना कहै छै।”

“एकदम ठीक बोली रहलौं छैं।” काको ठठाय कें हँसतें आरो तेतरी के माथा सहलैतें बोललै।

“एह, हम्मैं कहाँ कहलियै कि हेनों नै हुएँ पारें।” पंचु बंटु दिस देखतें बोललै।

“हमरों दिस देखी कें की बोलीं रहलौं छैं। हम्मैं थोड़े बोललौं

छिये।” बंटु ने आँख बड़ो करतें कहलें छेलै।

“अरे, तोरा सिनी कबूतर-कौआ नाँखी कैहिने लड़ें लगले। कलकों कथा के आगू सुनना छौ की नै ?” काकां हाथ डोलाय-डोलाय कें कहलें छेलै, तें सब एक्के साथें चिल्लैलै, ‘हों।’ आरो सब पालथी मारी चटाय पर चुपचाप बैठी रहलै।

“मँहगी, तहूँ यहाँ खटिये पर आवी जो!” काकां दायां हाथों सें खटिया के पासी कें दू दाफी थपथपैतें कहलें छेलै।

“नै दादा, हम्में मचिया लै आनै छियै। तोरो जातरा-कथा तें हेने बुझावै छै; जेना हम्मी जातरा करलें रहों।” कहतें-कहतें ऊ वहाँ सें निकली जल्दिये मचिया लेलें आवी गेलों छेलै। बस ओकरों बैठै भर के देर छेलै कि काकां कहना शुरू करलकै, “तें मुजप्फरपुर सें निकली कें हम्में सीधे गोरखपुर पहुँची गेलियै, यानी उत्तर प्रदेश के गोरखपुर। जानै छें, मुजप्फरपुर सें कत्तें दूर छै, गोरखपुर ? एकासी कोस दूर। जों एक कोस में दू मील मानी लें, तें कत्तें मील होलै?”

अभी उत्तर दै लें पंचु सुरफुरैये रहलों छेलै कि तेतरी टनकी पड़लों छेलै, “एक सौ बौसठ मील।”

“एकदम ठीक। आखिर प्रशांत गुरुजीं पढ़ाय छौ नी, जानभैं केना नै।” काकां चुटकी बजैतें कहलकै, “आरो की तोहें जानै छें कि लगभग सोलह सौ मीटर के एक मील होय छै। मीटर माने कपड़ा नाँपैवाला। आरो जों हाथी एक घंटा मे पनरों-सोलो मील चलै छै, तें कै कोस चललै बंटु?” काकां बंटु सें पुछलकै—जेकरों ध्यान तें काकाहै पर छेलै, मतर दोनो हाथों सें गोड़ों के अंगुरी पुटकावै में लगलों छेलै। काका के सवाल सुनथें दोनो हाथों कें गोदी में रखी उत्तर जानै लेली मुड़ी ऊपर करी लेलकै। तेतरी ताकों में छेवे करलै, से झट सें बोललै “सात-आठ कोस।”

“एकदम ठीक।” काकाहो तुरत बोली पड़लै, “आरो, गर्मी दिनों में संझकिये बेरा चलें पारें। भोरे सात-आठ के बाद तें खाली आरामे में दिन कटै छै। खाली झुपनियैतै रहै छै। आबें एक घंटा में हाथी जों साते कोस चललै आरो ऊ रात भरी तें नहिये नी चलतै। बेसी-से-बेसी चार-पाँच घंटा। तें मुजप्फरपुर सें गोरखपुर आवै में होन्हौ कें तीन दिन तें लगिये गेलों छेलै। रात भरी हाथी पर रुकी-रुकी कें तीन दिन तांय

चलते रहलियै।” फेनु जल्दिये बंटू दिस घुमते ओकरा से पुछले छेलै,
“अभी जे तोहें गोड़ के लों गिनी रहलों छेलें। की तोहें बतावे पारें कि
हाथी के चार गोड़ में कते लों होय छै?”

“बीस।”

“नै।”

“सोलह।”

“नै।”

“तबें कते होय छै?” तेतरीं पुछलें छेलै।

“जानी लें, हाथी के अगुलका दोनो गोड़ों में पाँच-पाँच आरो
पिछुलका दोनो गोड़ों में चारे-चार लों होय छै। खैर हमरासिनी चौथों दिन
गोरखपुर पहुँची गेलां।”

“वहीं, जहाँ गोरखनाथ जी के मन्दिर छै? तबें तें मंदिर देखलें
होवो। बाबां ऊ मंदिर के बारे में हमरासिनी के बतलें छेलै।” पंचु
बोललै।

“इच्छा तें हमरो खूब छेलै मतर गोरखपुर पहुँचवे करलियै भोरे
सात बजे। हाथी आबें आगु बढे लें तैयारे नै छेलै। बस एके रस्ता बची
गेलों छेलै कि ओकरा लैके हममें रोहिणी नदी पहुँची जाँव।”

“ई की गंगे नदी नाँखी कोय नदी छेकै?” बंटु पुछलें छेलै, “की
चानन नदी नाँखी यहू पहाड़े से निकलै छै?” बंटु पुछलें छेलै।

“ठिके कहलें। रोहिन नदीयो नेपाल के शिवालिक पर्वत से
निकलै छै आरो गोरखपुर के घाघरा नदी में मिली जाय छै। खैर, डुबकी
के लैके हमरासिनी रोहिणी नगीच ऐलियै, तें डुबकी सीधे नदी में डुकी
गेलै आरो सूँडों में पानी भरी-भरी के अपनों ऊपर ढारें लगलै। हममें तें
बची गेलियै मतर महावत काका भीजी के सरगद।”

“हेनों कैन्हें करलकै, हाथीं?” पूछे वक्ती तेतरी के आँख फैली
गेलों छेलै।

“बतलें छेलियो नी, हाथी गरमी नै बर्दास्त करे पारै छै, यै वास्ते
पानी आकि नदी से हाथी के बड्डी लगाव रहै छै। रातो नदी आकि झील
में सुस्तैते रहलों। ई तें दिने छेलै—वहू में गर्मी के दिन।”

“हाथी के एते गर्मी कैन्हें लगै छै, काका?” तेतरी के प्रश्न

करतैं पंचु फेनु कुनुमुनैलो छेलै आरो बोललै, “बेसी जानना छौ, तें हाथी सें जाय कें पूछी ले।”

“अरे पंचु, कत्तें सुन्दर बात तें करी रहलौं छै, यैं। जानै लायक बात छै। अच्छा पंचु गर्मी दिनो में तोहें कै दाफी नहाय छैं?”

“केन्हौ कें एक दाफी, वहू बाबू के डरौं सें। ठंडा दिनो में तें माय के मारलौ पर नै नहाय छै। देह-हाथ गन्हाय छै; बोटू हेनौं।”

ई बातों पर पंचु जरुरे तेतरी पर धौल जमाय देतियै, बड़ी होलै तें की। मतर कनौजिया काका आरो बाबू के डेर ओकरा हेनौं करै सें रोकी देलें छेलै। तेतरीयो एत्तें बोली गेलै, तें बाबू आरो काकाहै के बल्लों पर।

“तें, तोहें पुछलैं कि हाथी कें एत्तें गर्मी कैन्हें लगै छै? है तें तोरा बाद में बतैबौ। पहिलें रोहिन नदी के बात जानी ले। जबें डुबकी नदी मे डुबकी दै रहलौं छेलै—तखनी हम्मैं तैरी कें नदी काता आवीं गेलियै आरो नदी कें गोड़ें लगलियै। आबें पूछें कैन्हें, कैन्हेंकि यही नदी के किनारा पर आवी कें भगवान बुद्ध अपनौं राजपाटवाला पोशाक उतारी कें साधू-संन्यासी बनी गेलौं छेलै।”

“सहिये काका?”

“हों, लोगें तें यहा कहै छै। यही सें हम्मैं ऊ नदी कें गोड़ें लगलियै।”

“तबें तें ऊ नदी कभियो नै सुखतें होतै?” तेतरी बोललै ।

“भगवान करें कभियो नै सुखें। काका बोललौं छेलै आरो तुरत्ते तेतरी के पहिलौं प्रश्न के उत्तर दियें लगलै, “तोहें पुछलैं कि हाथी कें एत्तें गर्मी कैन्हें लगै छै; ते जानी ले—हाथी बेसी-सें-बेसी एक कोस एक दाफी में चलें पारें। बेसी चलला पर की होय छै कि ओकरो देहों में दरार पड़ें लगै छै। भारी देह होला के कारण ओकरो देहों के गर्मी बढें लगै छै। वही गर्मी कें शीतल करै वास्ते या तें अपनौं सूँढों सें देहों पर पानी उझलतें रहै छै आकि नदी-पोखर देखलकों, तें वही में घुसी कें खाड़ों होय गेलै।”

“ओ। आबे बुझलियै। तबें तें ऊ नदिये में सँझकी तांय खाड़ों रही गेलौं होतै ?” पंचु के पुछला पर काका कहलकै, “ओकरो बाद की

होलै नै कहें पारों । हम्मैं बग्घी पकड़लियै आरो एक झपट गोरखबाबा के मंदिर देखी ऐलियै । बेरा झुकै पर छेलै, जखनी लौटलियै । डुबकी जना हमरे प्रतीक्षा में रहें । हमरा देखथैं अपनों सूँढ़ हमरों दिस बिछाय देलकै आरो हम्मैं सूँड़े के सहारा हौद में जाय बैठलां । अबकी सोची लेलें छेलियै—डुबकी भले जहाँ-जहाँ रुकें, हमरा रुकी के कहूँ नै जाना छै । कोय मंदिर-मूरत के दर्शन नै करना छै । बस सीधे अमृतसर ।”

कि तखनिये डुबकी के शंखवाला आवाज जोर सें गुंजलों छेलै ।

“अरे हेनों की होय गेलै । डुबकी कैन्हें बुलाय रहलौं छै । आगू में चार दर्जन केला, सेर भरी गहुम आरो ढेरकों घास-पात तें रखिये देलें छेलियै ।” काकां अपने आप में बुदबुदलै ।

“सुनै छियै काका कि हाथी केतारी खेतों में घुसी कें केतारियो खाय जाय छै ।”

“मत पूछें, तेतरी बेटी, केतारी तें ओकरो एकदम सें प्रिय भोजन छेकै, जेना कि महुआ के दारू । अरे, महुआ के रसे पीयै लें नी नदी पारों में वनवासी सिनी के बस्ती मे कभी काल घुसी जाय छै आरो घरों में घुसी कें सब टा महुआ-रस पीवी के झुमलों-झामलों जंगल दिस चल्लों जाय छै । वहू एक-दू नै, पाँच-छों हाथी ।”

“बाप रे, बाप ।” कहतें-कहतें तेतरी के देह एकदम सें भोआय गेलों छेलै । कि तखनिये डुबकी के चिग्घाड़ फेनु गुंजलों छेलै ।

“आबे हम्मैं रुकें नै पारों । हुँ-नै-हुँ प्यास लगी गेलों रहें ।” एतना कहतें काका उठलै आरो एकेक करी कें तेतरी, पंचु, बंटु के माथा पर हाथ रखी-रखी के कहलें छेलै, “कल मुँ-हाथ धोय कें भोरे-भोर हमरा कन पहुँची जाना छै ।” फेनु मंहगी के देखतें कहलकै, “कल नागा नै होना चाही; जेना आय होय गेलै । सात बजे तांय डुबकी कें नहाय-धोलाय, खिलाय-पिलाय कें तैयार करी देवै । कल सें असली कहानी शुरू होतै । की सुग्गा, मैना, कबूतर, सुनना छै की नै?”

“हों काका ।” सब एक्के साथ बोली पड़लौं छेलै ।

॥ पाँच ॥

जखनी मँहगी अपनों तीनों बच्चा के साथ कनौजिया काका के बखारी पर पहुँचलौं छेलै, तखनी काका एक आमों गाछी के नीचें अपनों मुँहों पर हथेली के तुतरू रखी 'कुहू-कुहू' करी रहलौं छेलै आरो हुन्नं सें कोयल रों आवाजो आवी रहलौं छेलै, "कुहू-कुहू।"

"की करी रहलौं छौ लाल दा! कोयल कें आवाज दै छौ?"

"अरे असली कोयल, मैना, बगरो ते ई सनी छेकै, जे तोरों साथ ऐलौं छौ। मॉन नै लगै छै, मँहगी, तें यहा रं कोयल-मैना सें बात करतें रहै छियै। मॉन बहली जाय छै।" कि तभिये हुनकों नजर तेतरी पर पड़लै, तें पुछलकै, "अरे तोहें हथेली में मुँह छिपलें हँसी कैन्हें रहलौं छैं?"

कि तखनिये पंचु बोली पड़लै, "हम्मं नै, बंटु बोललौं छेलै"

आरो बंटु बार-बार इनकार में हाथ डोलैतें बोली रहलौं छेलै, "नै, हम्मं नै, पंचुवे बोललौं छेलै।"

"अरे कोइयो बोललौं रहें, पहिले ई ते बताव, की बोललौं छेलै।" कनौजिया काकां अकबकैतें होलें पुछलकै ।

"हम्मे कहियौं लाल दा, आवी रहलौं छेलियै, तें बंटु पीछू से बोललौं आवी रहलौं छेलै, आमों के लकड़ी कड़ा-कड़ी....।" एतना कही तेतरी मुँहो पर फेनु हाथ रखी के हँसें लगलौं छेलै, तें काका बोली उठलै, "एकरा मे नै-नै करै के की बात छै। हम्मे बोली दै छियौ।" एतना कहना छेलै, कि तेतरी मुँहो पर रखलौं हथेली कें एतन्है उठाय लेलकै कि नाको झपाय जाय।

"एह, जना लगै छै, बोलले भर सें सब गन्हाय जैतै—तें चलें, नै बोलवै। अच्छा ई ते बताव—तोरा तीनो में कोय, हाथी पर आरो कोय दोसरो कविता जानै छैं, ई पिहानी छोड़ी कें ?

"हम्मं जानै छियै नी, काका।" तेतरीं मुँहों पर सें हाथ हटैते कहलकै।

"अच्छा, सुनाव तें।"

आरो तेतरी दोनो हाथ हिलाय-हिलाय कें गावें लगलै:

टुकडुम-टुकडुम हाथी राम

तोरो सवारी बिना लगाम
 सूँढ़ लटकलो अजगर रं
 चमड़ो तोरो पत्थर रं
 दाँत दुधे-रं चमचम-चम
 खाना मॉन भरी नै कम
 पर टुकनी रं आँखे जाम
 टुकदुम-टुकदुम हाथी राम ।

पेट छेकौं कि छेकौं पहाड़
 गोड़ छेकौं या गाछे ताड़
 लगौं डमोलौं दोनो कान
 तोरो मालिक बस पिलवान
 सब बुतरू के तोरा सलाम
 टुकदुम-टुकदुम हाथी राम ।

कविता खत्म होथैं काका एकदम बच्चे नाँखीं थपड़ी बजाय-बजाय
 कें गोल-गोल घूमें लगलै। ई देखी के तेतरीयो उछली-उछली कें थपड़ी
 बजावें लगलै।

काका रुकलै, तें तेतरी के दोनो हथेली अपनों हाथो में लेलें
 बोललै, “तोहें तें हाथी के इतिहास-भूगोल एक्के छोटों-रं कविता में बताय
 देलें। आवे कुछुए कहै के पहिले तोरो कविताहै पर बातचीत होय जाय।
 तहूँ गौर से सुनियें मँहगी। है ते ठिक्के बात छेकै कि हाथी के चाल
 टुकदुम-टुकदुमवाला होय छै मतुर जरूरत पड़ला पर हाथी पचासो
 किलोमीटर के रफ्तार से दौड़ें पारें। की बुझलैं! आरो तोहें की बोललैं—सूँढ़
 लटकलौं अजगर-रं। एकदम ठीक बोललैं। मतर अजगर बोझों नै उठावें
 पारें आरो हाथी के सूँढ़ ! जानै छैं साढे तीन सौ किलो ग्राम से बेसीये
 वजनी वाला सामान उठावें पारें। आरो देखवें” ई कही कें काकां जेबी से
 एकठो अठन्नी निकाली लेलकै आरो हाथी के आगू फेकी देलकै। हाथी
 आगू बढ़लै आरो सूँढ़ो से अठन्नी उठाय कें काका कें दै देलकै। तखनी
 काका डुबकी के नगीच पहुँची गेलों छेलै ।

चौवन्नी लैकें लौटलै, तें बोललै, “देखलैं, खाली भारिये चीज नै

अठन्नीयो उठावें पारें। हाथी के सूँढ़ एकरों हाथों के काम करै छै। है केला, घास, पत्ता, टहनी आखिर सूँढ़े सें तें उठाय के मुँहों में डालै छै। तोहें नै देखलें छें, हम्मे देखलें छियै कि केना हाथी गाछ के ठार सूँढ़ो सें झुकाय कें अपनों बच्चा कें खिलावै छै। देखलें अजगर-रं काला सूँड़ कर्ते काम के होय छै। यही सूँढ़ो सें हाथी गैलेन-गैलेन पानी पीवी जाय छै। गैलेन बुझै छें, तेतरी ?”

तेतरी नै कहै लें मूड़ी हिलैलें छेलै, ते काका बोललै, “एक गैलेन मतलब लगभग चार लीटर; पच्चीस गैलेन के मतलब होलै कि दिन भरी मे सौ लीटर पानी पीवी जाय छै।”

“बाप रे, बाप! हमरा सिनी के तें दिन भरी मे सेर भरी पानी पीतें दम फूलें लगै छै। बंटु तें आरो सुंडा।” तेतरी बोललै, तें काकां कहलकै, “अच्छा, ढेंसा-ढेंसी के कोय जरूरत नै छै। जानै के बात छै। हाथी अपनों सूँढ़ों सें चार सें पाँच किलो मीटर दूरे सें पानी के गंध लै लै छै। तेतरी तोहें कहलें नी-चमडी तोरों पत्थर-रं.... ठीक बोललें—एक इंच सें कम मोटों नै होय छै एकरों चमड़ी। मतर कनपट्टी के चमड़ी मुलायम होय छै। महावत यही कनपट्टी के चमड़ी कें गोड़ोवाला अंगुरी सें ओकरा चलै के इशारा करै छै, आरो एक बात, भले हाथी के चमडी मोटों आरो पत्थर रं लगें—सूरज के रौद एकरा बड़ी तिक्खों लगै छै, मतर यहीं से ई अपनों ऊपर पानिये नै, धुरदो डालतें रहे छै कि रौद के दुष्प्रभाव नै पड़ें। बुझलें, हाथी कैन्हें अपनों माथा पर धुरदा डालै छै। ...आरो तोहें की बोललें—खाना मॉन भरी, नै कम एकदम ठीक बोललें बलुक कभियो-कभियो तें बेसिये। आरो देखें तोहें की सुन्दर कविता पढ़लें—लगौं डमोलों तोरों कान। डमोले-रं हाथी के कान झुलतें रहै छै। जानै छें कैहिने? अच्छा बताव तें डमोलों सें गर्मी दिनो में की बने छै?”

“ताड़ों के पंखा।” सब्भे बच्चा एक्के साथ बोललै।

“पंखा के की काम छेकै?”

“गर्मी दूर करवों।” एक्के साथ सब जोरों सें बोललें छेलै ।

“एकदम ठीक। तें जानी ले, हाथी के कान हाथी लें पंखा छेकै। है तें कहवे करलियौ कि हाथी कें मोटों चमड़ी आरो भारी शरीर के कारण बड़ी गर्मी लगै छै। तें, हाथी जे लगातारे कान झुलतें रहै छै, अपनों गर्मिये

दूर करै लें। ...तेतरी, आरो आँखी वास्ते तोहें की बोललें, जरा फेनु से बोलें तें !”

“पर टुकनी-रं आँखे जाम।” तेतरी झट-सना बोललै ।

“हों, टुकनीये-रं तें हाथी के आँख होय छै। यही सें दिनहौ में कम सूझै छै। गर्मी दिन मे तें आरो कम। आरो ऊ देखैं, हाथी के आँखी में कत्तें लोर छै।” काकां दुबकी के आँख दिखैतें बोललै ।

“हों काका, हाथी तें कानी रहलें छै।”

“कानै नै छै तेतरी; है जे टुकनी-रं हाथी के आँख होय छै—एकरोँ डिम्मी सिनी जल्दिये सुखें लगै छै। ऊ सुखें नै, तहीं सें आँखी सें पानी निकलतें रहै छै। देखै छै नी, ऊ पानी आँखी सें बाहर तांय आवीं गेलों छै। लगै छै, खूब भीतर-भीतर कानतें रहें।”

“बाप रे बाप; काका, तोहें हाथी के बारे में कत्तें बात जानै छौ!” तेतरी के आँख आचरज सें बड़ों होय गेलों छेलै।

“तोरा सें बेसी कहाँ। सब बात तें तोरे कविता में छौ। की कहलैं—दाँत दुधे-रं चम, चम, चम। जानै छैं तेतरी, यही दाँत सें हाथी गाछ के खाल छीली कें ओकरो पानी पीवी जाय छै आरो पहाड़-रं एकरोँ देहे नै, पहाड़े-रं ताकतो छै। गेंडा तें एकरोँ डरों सें सुटियैले रहै छै। जों यें अपनों दाँत सें ओकरा पर हमला करी दै तें ओकरोँ देह के खोलिया तक उतरी जावें पारें। हों। हाथी के दाँत हाथी लें हथियारो होय छै, जानी ले। ई दाँतों सें जरूरत के समय मट्टी खोदी कें पीयै लें पानी निकाली लै छै।”

“काका, सच्चे में एत्तें कोय नै जानतें होतै, जत्तें तोहें जानै छौ।”

“तहूँ ते कत्तें बात जानै छैं, तेतरी । तोरों कविताहै सें हमरा पता चली गेलै। बुतरू सिनी हाथी कें की सलाम करतै; तोरो बुद्धि पर तें हाथिये अभी तोरा सलाम करतौ; देखियै। आरो काका दुबकी दिस होय कें कुछ इशारा करलकै, कि ऊ जरा-सा दोनो अगुलका गोड़ उठैतें सूँढ़ कें साँप के फन नाँखी ऊपर उठैले छेलै आरो जोर के शंख नाँखी आवाज करतें सूँढ़-गोड़ नीचें करी लेलें छेलै। ई देखथें तेतरी, पंचु, बंडु, ताली पिटतें उछलें लगलें छेलै।

“आबें बोल, तोरों वास्ते दुकानी सें की लानी दियौ।” काकां खुश होतें कहलकै ।

“कुछ नै, काका। कलकों आम-लीची तें घरों में धरले छै। तोहें जल्दी सें ई बताय दौ कि ई हाथी ऊ रोहिन नदी सें जल्दी निकललौं कि साँझ तांय नदीये में दुकले रही गेलौं।

“हेनों तें नहिये होलौं होतै कि दुबकी नहिये में दुबकी देतें रही गेलौं होतै। बेसी-से-बेसी घंटा भरी रहलौं होतै। फेनु बुद्ध के जीवन सें जुड़लौं नदी आरो हाथी! हम्मैं कथी लें महावत काका कें कुछ कहतिये कि दुबकी के बाहर करों।”

“बात नै बुझलियौं, लाल दा!” मँहगीं पुछलकै ।

“हों मँगन, बुद्ध के जीवन सें यहू कथा जुड़लो छै कि हुनकों जन्म के पहलें एक रात हुनकी माय माया देवी नें हेनों सपना देखलकै कि एकठो दिव्य उजरों हाथी हुनका सें कही रहलौं छै—हम्मैं तोरों कोखी में लोककल्याण वास्तें प्रवेश करी रहलौं छियौं। हेनों मानलौं जाय छै कि वहा उजरों हाथी बुद्ध बनी कें लोककल्याण लेली अवतार लेलकै।”

“लाल दा, ई कथा कौनी किताबों में मिलै छै?”

“अश्वघोष के संस्कृत में लिखलौं महाकाव्य में ई कथा आवै छै, जे आय सें समझें कि बीस सौ साल पहिलें लिखलौं गेलै; फेनु दू-तीन साल के बाद चीनी आरो तिब्बती भाषा में अनुदित होलै । आबें तें ठिकाना सें कोइयो किताब नै मिलै छै।”

“ओ।”

“काका, की हाथी उजरो होय छै?” तेतरी तुरत बोललै जे यहा इंतजारी मे छेलै कि बाबू चुप हुए आरो वैं ई बात पूछें।

“होय छै नी, बेटा। एकदम होय छै आरो उजरों हाथी के जन्मकथाओ अपने अंग प्रदेश से जुड़लौं छै। एक नै, दू-दू कथा। सुनै लें चाहवैं।”

“एकदम काका।” तेतरीये नै, बंटु साथें पंचुओ बोललौं छेलै।

“आरो हौ जातरावाला कथा?” काका पूछलकें ।

“ऊ एकरों बाद सुनवै। पहिलें उजरों हाथी के कथा कहौं!”

“तें सब पालथी मारी कें बैठी जा। कथा तें बहुत लंबा छै मतर

छोटे करी कें सुनाय छियौ। एक दाफी सुर-असुर मानी देवता आरो असुर-असुर माने जे देवता नै रहें, कहै के मतलब आदमी। तें देवता आरो आदमी दोनो मिली कें समुद्र मथै के बात सोचलकै, तें घोटनी केकरा बनेलकै जानै छें; अपने मनार पर्वत कें। समुद्र के घोटना शुरू करलकै, तें चौदह ठो रतन निकललै; वही चौदह रत्नों में उजरो हाथियो छेलै जेकरो नाम ऐरावत छेलै, जे देवता के राजा इन्द्रें अपनों लुग रखी लेलकै।”

“केन्हों होतै ऊ हाथी?” तेतरी कें आँख बड़ों होय गेलै ।

“अजीब-अजीब कथा छै ऊ, ऐरावत हाथी के बारे में । कोय कहै छै, ऐरावत के चार दाँत छेलै, तें कोय कहै छै—दस दाँत छेलै। हेनों जे भी कहै छै, तें ओकरो पीछू यही बात होतै कि ऐरावत चारो दिशा के रक्षक छेकै। जे दस दिशा मानै छै, ओकरो मोताबिक, ऐरावत दसो दिशा के रक्षक छेकै।”

दस दिशा के बात सुनैलकै, तें तेतरी टनकी पड़लै, “काकाऽऽऽ, दिशा तें चारे होय छै, हम्में कविता घोकी कें जानलें छियै :

उत्तर में उतराहा सब
दक्खिन में दखनाहा सब
सूरज उगतै पूरब दिस
कत्तो तोहें करवे इस
डुबतै तें बस पच्छिम में
कत्तो तोहें करवे इस ।”

कविता सुनी कें कनौजिया काका हँसतें-हँसतें बोललें तें तोहें एकदम ठीक, मतुर ई चारो दिशा के चार कोण, चार दिशा कहावै छै, जेकरो नाम होय छै, तें आठ होय गेलै आरो फेनु ऊपर-नीचें । होलै नी दस ?”

“सहिये तें, आबें बात कें बदलतें । आरो दोसरो कथा की छेकै?” ई बातों में रस नै पावी के तेतरी बीचें में कहलें छेलै जे बातों के समझथें काकौं कहलें छेलै, वहू सुनाय छियौ...अपनों यहा अंग प्रदेश में हर्यक नामक एकटा बड़ा प्रतापी गजा होलै, जौनें एक बड़ा भारी जग्ग करलकै, जेकरो पुरहैत छेलै रिखि शृंगी के पिता विभांडक मुनि। जबें जग्ग

समाप्त होलै, ते इंद्र के प्रसन्न होला के कारण जग्गों से अश्वत्थामा नाम के एक दोसरो ऐरावत हाथी निकललै।”

“हेनों की हुएँ पारें, काका?” तेतरी के उत्सुकता रुकें नै पारलै।
“एकरा हेनो कें समझलौं जावें पारें कि जग्ग समाप्ति पर खुश होय कें इंद्रें दोसरो ऐरावत हरयंक राजा कें भेंट करलकै।”

“तें, वहू की समुद्रे सें निकललौं छेलै?”

“अरे, अपनों अंग प्रदेश मे हेनों-हेनों हाथी के कमी छेलै की! जबें बड़ों होभे नी, तेतरी, ते महाकवि कालिदास के किताब रघुवंशम् आरो महाकवि चंद्र बरदाई के किताब पृथ्वीराज रासो पढियें, तबें तोरा पता लगथौं कि अपनों यहाँ केन्हों-केन्हों विशाल हाथी होय छेलै आरो सब-के-सब सिखैलौं-पढ़ैलौं। हाथी के रोग दूर करै वासतें तबें ही जुगों में एक रिशियो छेलै, जिनकों नाम पालकाप्य छेलै। आरो है के कहें पारें कि बहुत पुरानों समय में हाथी के चार दाँत नहिये होतै। कहै छै—आदमी के नेंगडियो होय छेलै।”

“की बोलै छौ, काका!” तेतरी बोललै, तें पंचु, बंटुओ खिलखिलाय कें हँसी पड़लै।

“अरे झूठ थोड़े बोलै छियौं। बडका-बड़का विद्वानें खोजी कें बतैलें छै। आबें जौं तोरा सें कहियौं कि हाथी कभियो सूअरे एतें उच्चों होय छेलै, तें मानभैं। नै नी मानभैं। मतुर है सच छेकै। हवा-पानी बदल्लों गेलै आरो सूअर के आकारवाला हाथी बढी कें ई आकार में आवी गेलै। हवा-पानी के असर ते पड़वे नी करै छै, तेतरी। अपनों देश के जेहनों हाथी देखाय पड़ै छां; दोसरो देश के हाथी आरो बड़ों होय छै। आगू चली कें जानभैं; अफ्रीका हेनों महादेश के बारे में। वहाँकरों हाथी अपनों देश के हाथी सें बेसी बड़ों आरो बरियो होय छै। दुक्खी के कानों सें डेड़ गुना बड़ों आरो दाँतो एकरा से डेढ़ गुना बड़ों। हाथी पाँच हजार सें सात हजार सेर के हुएँ पारें। जखनी हाथी जनमै छै, तखनिये ते एकरों वजन दू मॉन सें बेसीये होय छै।”

“बाप रे, बाप! केन्हों विशाल लगतें होतै।” पंचु अपनों दोनो हाथ ऊपर करतें बोललौं छेलै।

“एकरा में की शक! बरियो तें एतें हुवै छै कि बड़का-बड़का

भैसा कें सूँढ़ों से उठाय कें पटकी दें।” काकां मूड़ी कें ऊपर उठाय हेना नीचे करलें छेलै, जेना केकरो माथा पर लै नीचे पटकते रहें ।

“बाबू हो, बाबू।” कही कें तेतरी दोनो हाथ जोड़ी कें गल्ला से सटैते कहलें छेलै, “काका आबें डरावैवाला कहानी छोड़ी कें बढियाँ कहानी सुनावों। है सुनावों कि गोरखपुर में फेनु की करलौ!”

“फेनु की करलियै। डुबकी कें नहिये में छोड़ी कें, महावत काका हेली कें किनारी आवी गेलै आरो हममें काका के कानों में कुछ बोली कें वहाँ से निकली गेलियै। कहाँ गेलियै ? की करलियौ ? है सिनी बात आबें कलकों लेली। हों, आय तोरों सिनी लें कुछ खास मँगवैलें छियौं। घरों में जाय कें खैइयें आरो माय से पुछियें—ई सब कहाँकरों बनलें छेकै।” ई कही कनौजिया काकां घरों से एकटा छोटो-रं झोली लै आनलें छेलै आरो मँहगी कें थमैते कहलें छेलै, “कल आरो सबेर लै आनियें, ई सब के। आठ, नो रोजो के बाद इस्कूल खुली जैते, तें नहिये नी आवें पारतै। हममें आमो के टहनी तोड़ै लें चललियौ। डुबकी कें खिलाय के बेरा होय चललै।”

आबें बुतरूओ सिनी के ध्यान पोटरि आरो बाबुए पर छेलै कि कते जल्दी बाबू वहाँ से उठें।

॥ छों ॥

“देखें, तोरों काका की करवो करी रहलें छौ!” तेतरी दिस मुँह करते हुए मँहगी बोललै, “बोर गाछी के तिरफेकन देवो करी रहलो छौ।” फेनु दस हाथ दूरे से कहलकै, “बहुत दिनों के बाद ई भजन गैते देखी रहलें छियौं, लाल दा।”

“ओह, तोरा सिनी आवी गेलै” काकां मँहगी दिस घुमते कहलें छेलै, “आरो ऊ तीनो?”

“ऊ तीनो तोरे पीछू खाड़ों होय कें तोरे देखी रहलो छौं कि गाछी

पर की फेकी रहलौ छौ!”

काकां घुमी कें देखलें छेलै आरो खुश होतें हाथों के बचलौ सब चौर कें गाछी के खोड़र में फेंकतें कहलें छेलै, “खोड़र में सुग्गा सिनी के बच्चा भुखलौ नै रही जाय, यही सें चौर गाछी के खोड़र सिनी में फेकी रहलौ छेलियै ।”

“की खोड़र में सुग्गा के बच्चा छै? हम्मं देखवै काका।”

“देखवैं, ते देखियैं हम्मं औंकरी फेकवै आरो ऊ सिनी लाल-लाल लोल बाहर निकालतौ।” तेतरी कें मचलतें देखी कें काकां वही करलकै आरो हुन्नं सें आवाज करतें सुग्गा के बच्चा सिनी लोल बाहर करलें छेलै। तें, एक्के साथ तेतरी, पंचु, बंटु के चेहरा पर हँसी खिली गेलौ छेलै।

“देखलें नी तोरासिनी। सँझकी जखनी सुग्गा के भुण्ड गाछी सिनी पर जुटै छै नी, तखिनको की कहियौ। है देखै छौं—सुग्गा सिनी वास्ते जग्घा-जग्घा पर औंकरी रखी देले छियै आरो मिरचौयो। मिरचाय तें आरो मनो से खाय छै, सुग्गा।”

“सुग्गा कें झाल नै लगै छै, काका ?” पुछतें तेतरी के आँख फैली गेलै ।

“नै । ओकरो जीहा में झाल लगैवाला तंतुवे नै होय छै ।”

“सुग्गा के झुंड हम्मू देखवै, काका।”

“तें कलको चौपाल यहीं ठां लगतै आरो भोरे नै सँझकी। ठीक छै।” तेतरी के माथा पर हाथ रखतें काका कहलकै ।

काका के बातो के समर्थन में पंचु आरो बंटु बायां दिस मूड़ी झुकैले छेलै, ते तेतरी बोली उठलो छेलै, “नै काका, पहिले कहानी हमरा सिनी पहिलकेवाला जग्घा में सुनवै। यैठां ते ध्यान रही-रही सुग्गे पर चल्लो जैतै।”

“ठीक-ठीक। हम्मू मनो में यही सोची रहलौ छेलियै” कहतें काकां सबके पीठी पर बारी-बारी सें हाथ रखतें, सबके साथे बैठकी नगीच आवी गेलै। अभी हुनी अपनो कुसी पर बैठवे करतियै कि मँहगी सफेद दगदग कपड़ा सें ढकलौ एक बड़ो-रं बाटी हुनको दिस बढ़ाय देलकै।

“समझी गेलियै, समझी गेलियै; तेतरी-मांय हमरा लेली की

भेजलें छै। गोजिया होतै! बाप-रे-बाप, कै साल बीती गेलै तेतरी-माय के हाथों के बनैलों गोजिया खेलें। जब तांय पंडायन रहलै, तोरो घरों के गोजिया हफ्ता, दू हफ्ता में आविये जाय छेलै। खैर आबें ऊ सब बात याद की करना।” कहतें हुएँ काकां बाटी अपनों हाथो में लै लेलकै आरो घरों में रखी जल्दीये लौटी ऐलै।

“तें, तोरासिनी केँ आय गोरखपुर के बाद के कहानी सुनना छौं।” काकां एकदम प्रसन्न चित्तों सेँ कहलकै।

“हों।” तीनो के मुंहों सेँ एक्के साथ निकललौं छेलै।

“तें ठीक छै; सुनें! हम्में तें जानवे करै छेलियै कि डुबकी सँझकी सात-आठ के पहिलें गोड़ नै हिलैतै। महावत काकाहो हेनों नै करै लें चाहतै कि बाहर आवै लें कहें। गर्भिये हेनों छेलै आरो हमरा अयोध्या में रामलला मंदिर के परिक्रमा तें करनाहै छेलै, एकदम भोरे-भोर। से मनो में ऐलै पैदले अयोध्या चली दियै—राम जी के नाम लैकें। दौड़ै-धूपै पैदल चलै के आदत तें छेवे करलै। मतर भगवान के किरपा देखों कि तखनिये एक बग्घी हमरो नगीच आवी केँ रुकी गेलै। हम्में बग्घी सेँ बचै वास्तें हटिये रहलौं छेलियै कि कोचवान के आवाज ऐलै, “कनौजिया रे, हिन्ने-कन्ने?” नजर उठाय केँ देखलियै, तें बचपन के दोस्त छेलै जोगिया पांडे। फेनु तें सब्भे बात हम्में बताय देलियै। तें जानै छौ, जोगियां की कहलकै। कहलकै—पहिलका जनम में जरूर कोय पुन्न करलें होवें जे आय दोस्त के काम ऐवै। चल पहिलें तोरा अजोध्या पहुँचाय आवै छियौ, फेनु आरो कुछ देखलौं जैतै। हम्मू नै नै करलियै। बग्घी में बैठै के मजा पहिलौं दाफी लै रहलौं छेलियै।

“हाथी सेँ बेसी मजा आवी रहलौं छेलौं ?” तेतरी पुछलें छेलै।

“खूब मजा। जानै छैं केन्हो!” आरो काकां केहुनी-बाँही देहे सेँ सटैलें अपनों दोनो हाथ कटि टा आगू बढ़ाय के खूब तेजी से आगू-पीछू करतें गावें लगलै :

टप-टप, टप-टप

दू पहिया के घोड़गाड़ी

दौड़ी पड़लै

बिन्डोवे-रं

पोखरी के पानी पर जेना
मछली तैरै छप-छप, छप-छप
टप-टप, टप-टप ।

कनौजिया काकां देखलकै, ओकरों हाथ आरो बोलै के गति देखी
कें तेतरियो अपनों दोनो हाथ काँखी सें सटैलें, होने तेज गति से
आगू-पीछू करे लगलौ छै । ई देखी के काकां अपनों हाथ साथे पढ़ै के गति
आरो बढ़ाय देलें छेलै:

कभी रौद में
कभी छाँव में
कभी शहर में
कभी गाँव में
मोटर तक कें कुछ नै बुझै
पट्टी तर सें की रं सुझै
चाबुक नाँचै
ऊपरे सप-सप
टप-टप, टप-टप ।

आबें तें पंचु आरो बंडुओ के हाथ-जाँघ गति पकड़ें लगलौ छेलै ।
काकां कोन्हराय कें देखलकै, तें एक दाफी बोली साथें हाथ कें आरो
तेज करी देलकै:

जंगले-जंगल
कभियो परपट
कच्ची-पक्की सीधे सरपट
बस्ती के बीचों सें होलें
जेहनों कि सड़कों सें सरपट
खैलों-पीलों
सब्भे पचलै
पेटों में बस पानी ढब-ढब
टप-टप, टप-टप ।

पेटों में पानी ढब-ढब बोलै के बात सुनी कें खाली तेतरी, पंचु,
बटुए नै खिलखिलाय पड़लै बलुक मँहगियो कें हँसी आवी गेलै । काका

मुस्कैतें हुएँ रुकी गेलों छेलै।

“तबें की होलै ?” तेतरी हँसथें-हँसथें बोललै।

“तबें की! होना कें गोरखपुर सें अजोध्या आवै में छों-सात घंटा सें बेसी नै लगतियै मतर रुकतें, खैतें-पीतें हम्में तखनी पहुँचला, जखनी बेरा गिरै पर छेलै। दोस्त विदा लेलकै आरो हम्में एक मठ में ठहरी कें भोर के इंतजार करै लगलौं। अभी फरचों होय में समय बाकिये छेलै कि हम्में उठलियै, झोला उठलियै, जैमें जोड़ा भरी धोती-कुर्ता, गंजी छेलै, जेकरा घरों सें लेले चललौं छेलियै। नगीच के एक इनारा पर ऐलियै। असनान-ध्यान करलियै आरो पंचकोसी तिरफेकन लें रामलला मंदिर दिस बढी गेलियै।”

“काका, हौ मंदिर की पाँच कोस दूर छै।”

“से बात नै। पंचकोसी तिरफेकन के मतलब होलै मंदिर के पाँच कोसवाला घेरा आरो वही घेरा में घुमना। हमरों बाबुं तें अठारों कोसी परिक्रमा; करलें छेलै। मानी पूरे अवध के परिक्रमा आरो मांय चौदह कोसी परिक्रमा मतलब कि पूरे अयोध्या नगरी। मतर हम्में खाली रामलला मंदिर के करलियै, जे पाँच कोसों के दायरा में पड़ै छै। आखिर दिने-दिन हमरा गाजियाबाद जे निकली जाना छेलै, यही लेली। आखिर वहीं सें दिल्ली आरो फेनु अमृतसर जे निकली जाना छेलै।”

“तें तोहें अपनों डुबकी हाथी आरो महावत काका के इंतजार नै करलौ। आखिर जाना छेलौं तें हाथिये पर चढ़ी कें?” तेतरीं पुछलें छेलै।

“तोरा कहै लें भूली गेलियौ, कि हम्में महावत काका कें बोलाय कें की कहलियै। यहीं कहलियै, कि तोहें दुबकी कें लै कें आबें यहीं सें लौटी जा!”

“से कैन्हें, काका? तोहें तें कहलौ कि हाथिये पर पाकिस्तान-लाहौर जाय के सोची लेलियै।...की वहाँ सें दोसरों हाथी करी लेलौ ?”

“जों हेनों बोली गेलों होभौ, तें पहिलके सोचलौं बात बोलाय गेलों होतै। आबें तोहीं सोचें, जों हम्में हाथी सें अमृतसर तांय जैतियै, तें बीस-पचीस दिन एकरै में लगी जातियै। फेनु ननकाना साहब तांय हाथी कें लैकें नहिये नी जावें पारतियै-देश बंटी जे गेलों छेलै। हाथी तें हमरा कोय्यो हालतों में अपने देशों में छोड़ै लें लगतियै, ते ओकरा सें

अच्छा यहा छेलै कि ओकरा गोरखपुर में ही छोड़ी दौं। आखिर घरों में माय-बाबू कें तें यही कही कें ऐलों छेलियै—कातिक मास खतम होला के पहिले घोर लौटी जैवै। एकरों वास्ते जरूरी छेलै कि हाथी के सवारी के बदला कोय दोसरो रस्ता पकड़ौं। की कहिया तेतरी—अभी हम्मैं सोचिये रहलौं छेलियै—की करौं कि तभिये जोगिया बग्घी लेलें फेनु आवी गेलै आरो कहें लगलै, “अरे तोरा सें ई तें पुछवे नै करलियौ कि रामलला-दर्शन के बाद घोर केना लौटवे। जेना कें भी लौटै, गोरखपुर तें हम्मैं छोडिये आवें पारौं नी। कखनी या कहिया घुरै के विचार छै?”

“तें, हम्मैं अपनों मनो के सब योजना बताय देलियै। यहाँ तक कि—जों हमरा सरकारें नै जावें देलकै, तें कोय-न-कोय तरीका सें पाकिस्तानी सीमा में चलौं जैतै आरो ई गुरु सिनी के अस्थान देखिये कें आवे लौटवै, ते जानै छैं, हमरो दोस्त की कहलकै? कहलकै—कनौजिया हम्मैं यहा बग्गी सें तोरा अमृतसर के आखरी सीमा पर छोड़ी देभौ। एकरों वास्ते तोरा कोय मोटर-रेल करै के जरूरत नै छै। खाली हमरो लें तोहें एतने करियें कि जबें गुरु नानक देव के पवित्र थान पहुँचवे, तें हमरो तरफों सें दुआ-सलामत करलें अइयें कि गाँव में जे परिवार छोड़ी ऐलों छियै, ऊ सही-सलामत रहें!” ई कही कें काका चुप होय गेलों छेलै।

“की होय गेलौं, काका?” तेतरी पुछलें छेलै।

“कुछ नै। कौन रस्ता सें अमृतसर गेलियै, याद करी रहलौं छेलियै।” मनो के दुख छुपैतें काका बोललै, “खैर, रस्ता सें तोरा सिनी कें की लेना। बस यही समझी ले कि अपनों दोस्त के मेहरवानी सें हम्मैं आठे रोज में पंजाब पहुँची गेलियै आरो वहाँ सें अमृतसर। फेनु तोरा ई जानी कें आचरज होतौ कि अमृतसर ऊ सरोवर यानी विशाल तालाब के नाम छेकै जेकरा पाँच-छों सौ साल पहिले गुरु रामदास जी नें अपनों हाथों सें बनाना शुरू करलें छेलै आरो पाँचमो गुरु अर्जुन देव जी नें वही सरोवर के बीचों में आय सें छों साल पहिले गुरुद्वारा बनवैलकै, जेकरा आबें स्वर्ण मंदिर कहलौं जाय छै, कैन्हें कि गजा रणजीत सिंह नें बाद में ई मंदिर कें सोना के परत सें मढ़वाय देलकै। आरो हौ जे मंदिर के चारो दिस सरोवर छै, असल में वहा अमृतसर छेकै। अमृत के सरोवर, जेकरे नाम पर पंजाब के ऊ शहरो अमृतसर ही कहावै छै। अइयो कोय

गाँव के नाम पोखरिया मिलै छै। पता लगावैं, तें मालूम होथौ—कोय जमाना में ऊ गाँव में बहुत बड़ों पोखर छेलै। वहा रं। आरो एक बात जानै छैं, तोरा सिनी, हौ सरोवर पाँच सौ बीघा जमीन में फैललौं होलौं छै ।” काकां अपनों दोनो हाथ कें खूब पीछू दिस फैलैतें कहलें छेलै ।”

“तें, वहाँ कहाँ रहलौ? कहाँ सुतलौं, आरो कै दिन?”

“वहाँ खाय-पीयै के कहाँ कौन कमी छै, तेतरी ! रोज लंगर चलै छै। जी भरी खा आरो एक अधेलो नै देना। कोय धर्मो के लोग रहें, कोय पंथों के लोग रहें, सब के वास्तें लंगर खुल्ला। आबें खाय लें मिलिये जाय, तें सुतै लें भगवाने एत्तें बड़ों पृथ्वी बनैलें छै कथी लें। फेनु हमरों आँखी में नीने कहाँ! हमरों आँखीं में तें तालबंडी घूमी रहलौं छेलै।”

“ई तालबंडियो कोय सरोवर छेकै की?” तेतरी के उत्सुकताहौ एकदम बढ़लौं जाय रहलौं छेलै ।

“नै । गुरु नानक के जन्मथान छेकै, जे थान आयकल पाकिस्तान में छै। आजादी के पहिले भारते में छेलै।”

“तें, वहाँ गेलौ केना, काका?”

“हमरे नाँखी कोय फकीर स्वर्ण मंदिर ऐलौं छेलै। नै जानौ कैन्हें हमरा पर नजर पड़थैं हमरों नगीच ऐलै आरो कहलकै, ‘लगै छै तोहें असकल्ले कोय दूर दराज देशों सें ऐलौं छौ, बच्चा।’ आचरज तें ई छेलै तेतरी, कि ऊ फकीर अपने बोली में बोली रहलौं छेलै।”

“तें तोहें हुनका सें पुछलौ नै, कि हुनी कहाँ सें आवी रहलौं छै?” अबकी पंचु जरा आगु खिसकी कें बाललौं छेलै ।

“साधु-फकीर सें की पुछना आरो साधु-महात्मा सें की छुपाना। यही सें जबें ऊ फकीरें कहलकै—तलबंडी ननकाना साहब वास्तें निकललौं छौ की, तें हम्मैं झट सना ‘हों’ कही देलियै। तबें जानै छौ ऊ फकीर नें हमरा की कहलकै ? कहलकै ‘बेटा हमरों साथ चलौं।’ आरो हम्मैं बिना कुछ पुछले-पाछले ऊ फकीर के साथें चली पड़लिये। हुनी आगू-आगू आरो हम्मैं पीछू-पीछू। एक कोस, दू कोस—एकदम सुनसान-बियावन रास्ता।”

“काका, डोर नै लगी रहलौं छेलौं। की ऊ सरंगाबाबा जी छेलै, जे गुदड़ी में बच्चा लै कें भागी जाय छै?” कनौजिया काकां देखलकै ई पुछतें तेतरी खुदे डरी रहलौं छै। तें काकां वही ठां अपनों जतरा-कथा

रोकी कें बोललै, “अच्छा तेतरी, बाँका के की माने होय छै, जानै छैं?”
“नै।”

“ते, जानी ले। बाँका माने—बनलों-ठनलों, जे बहादुर रहें। बहादुर कोय आवैवाला संकट सें डरै छै की? वहू में साधु-फकीर पर की शंका करवों। हिनी सब तें धरती पर देवता के रुपे होय छै। वहू में ही फकीर तें अपने बोली में बोली रहलौ छेलै। हुएँ सकें, हुनियो हमरे नाँखी घरों सें निकललौ रहें आरो हुनियो यही कोय इलाकाहै के रहें। बाँके के आसपास के। बाँका की छोटों-मोटों इलाका छै ! आचरज होथौं तेतरी कि हुनियो होने निडर बनलौं भारत के पारवाला सीमा में चल्लौं जाय रहलौं छेलै। ई बात हम्में कभियो नै भूलें पारौं। हों, हुनी एतना हमरा जरुरे कही देलें छेलै कि हमरा सें कोइयो कुछ पूछें—कुछ नै बोलना छै।”

कि तभिये डुबकी आवाज करलें छेलै।

“देखलें, खिस्सा-गप्पों में हमरा एकरो खयाले नै रहलै कि डुबकी कें आय खानाहौ नै देलें छियै। नहवाय तें देलियै आरो खानाहै नै देलियै। बुढारी के ई दिमाग—भुलाय जाय छियै। आबें हमरा घंटा, दू घंटा डुबकिये पीछू लगलौं रहें पड़तै। बाकी तलबंडी ननकाना साहब रों कथा कल। आरो हों, तोरा तीनो लें, जानै छैं, करुआ मोड़ सें पेड़ा मँगवैलें छियौ। पूरे-पूरी दस ठो। दू-दू ठो तोरा तीनो भाय-बहिन आरो दू-दू माय-बाबू लें।” ई कहतें काकां मड़य के छज्जी पर रखलौं ठोंगा निकाली लेलें छेलै आरो तेतरी के हाथों में थमैतें पंचु-बंटु सें कहलें छेलै, केकरो हिस्सा में छीन-झपट नै करियैं! हों! यही लें तेतरी के हाथों में थमैलें छियै। आबें हम्में चललियौ, डुबकी के मौन भरी के भोजन तैयार करै लें। यही नी बोललौं छेलैं, तोहें तेतरी ?” आरो काका ठहाका मारी के हँसी पड़लै।

कनौजिया काका कें विश्वास छेलै कि आय जबें मँहगी बाल-बच्चा साथें ऐतै, तें ओकरो सिनी के चेहरा पर कुच्छु लब्बों खुशी जरुरे होतै आरो वही होलै भी । जखनी मँहगी बच्चा सिनी के लेलें मचान के नगीच ऐलों छेलै । तें तेतरी यही जोरों-जोरों सें बोलतें फुदकतें-फुदकतें ऐलों छेलै:

पानी ठनको बाँसी करों
देव रहै सब बान्ही जेरों
पेड़ा-करूआ मोड़ के पेड़ा
बाकी तें सब करै बखेड़ा ।

काका कविता सुनलकै, तें लपकी कें ओकरो दोनो काँखी में अपनों दोनो पंजा डालतें ओकरा आपनों माथा सें हाथ भरी ऊपर उछाली देलें छेलै आरो जल्दीये लोकतें नीचें चौकी पर बैठों कहलें छेलै, “है कहाँ से सीखी ऐलें? के सिखैलकौ?”

“मांय पेड़ा खैला के बाद ई कविता पढ़लें छेलै; तें हम्में याद करी लेलियै ।”

“एकदम ठीक पकड़लकौ, करुवा मोड़ के पेड़ा के सवादे अलग होय छै । होना कें पुनसिया के पेड़ा के भी कोय जवाब नै छै मतर करूआ मोड़ के पेड़ा खैला के बाद तें जिनगी भर कोय सुआद भूलें नै पारें । चल, कलके पेड़ा नाँखी मीट्टों कहानी आय सुनै लें तैयार हो जो ।”

“एकदम काका । तोहें कलको बात पुछवौ, तें एक-एक बात हम्में बतावें पारौं ।”

“एकदम पुछवौ । तोरा सें पूछौं-नै-पूछौं, पंचु आरो बंटु सें जरुरे पुछना छै ।”

ई बात सुनथें दोनो के कान एकदम खाड़ों होय गेलै; जेना निकट भविष्य में आवैवाला कोय विपत्ति देखाय दै देलें रहें आरो दोनो काका के मुँह दिस मुँह करी कबूतर-बच्चा नाँखीं बैठी रहलै ।

“तें सुन, ऊ फकीर साथें हम्मू पैदले-पैदल ननकाना साहब दिस चलें लगलां ।”

“ई ननकाना साहब की होलै आरो तलवंडी की होलै?”

“दोनो एक्के जग्घों के नाम छेकै। तलबंडिये के नाम बाद में ननकाना साहब होय गेलै।”

“तें, ओत्तें दूर पैदले चल्लों गेलौ! गोड़ नै दुखलौं?”

“कथी लें दुखतियै। कौन मारे दूरे छै अमृतसर सें ननकाना साहब। बस तीस-बत्तीस कोस दूर। ओकरा से बेसी तें भागलपुर के गंगा सें देवघर दूर होतै। नै बेसी तें कम-से-कम कोस भरी तें जरुरे। देखै नै छें, सौन-भादो में जनानियो सिनी भोरे जौल भरै छै आरो भिहानै जौल ढारी आवै छै; जेकरों कबूलती रहै छै। हम्में तें फकीर बाबा साथें दू दिन में ननकाना साहब पहुँचलौं छेलियै। आरो की बतैयौ तोरा सिनी कें, वहाँकरों गुरुद्वारा देखिये कें सब थकान दूर होय गेलै। अमृतसर के स्वर्णमंदिर से कम नै छै। महाराजा रणजीत सिंह के बनवैलौं गुरुद्वारा छेकै।”

“से की, गुरु नानक जी बहुत बड़ों साधु छेलै?” तेतरी दोनो हाथ फैलैतें पुछलें छेलै।

“बहुत बड़ों। बड़ों तें वही नी होय छै, जे आदमी-आदमी में भेद नै करें आरो यही बताय वास्तें नानक देव हिन्ने आसाम तक गेलै, तें दक्षिण में लंकाहौ तांय।”

“वही लंका, जहाँकरों राजा रावन छेलै?”

“हों वहीं। वहीं नै, हुनी कैलास पर्वत तक गेलौं छेलै आरो पच्छिम में वहाँ तांय, जहाँ मुसलमान सिनी के पवित्र असथान छै, जेकरा मक्का मदीना बोललौं जाय छै।”

“हों, है नाम शेखावत चाचा सें सुनलौं छियै। तें नानक देव पैदले ओत्तें-ओत्तें दूर चल्लों गेलै?”

“आरो नै तें की। ई लिखलो छै कि हुनी चौबीस साल में अट्ठाईस हजार किलोमीटर रों पैदले जातरा करलें छेलै। अट्ठाईस हजार किलोमीटर के मतलब होलै—नों हजार कोस, यानी कि अठारह हजार मील।”

“तें रस्ता में हुनका कोय रोकलकै-टोकलकै नै?”

“टोकलकै भी, रोकलकै भी। एक दाफी तें बादशाह बाबर नें शंका में हुनका बंदीयो बनाय लेलें छेलै, जबें हुनकों चेहरा पर देवतावाला

तेज चमकते देखलकै, तें जल्दीये छोड़ी देलकै। होनै कें उड़ीसा के जगन्नाथ मंदिर में हुनका ढुकै सें रोकी देलौं गेलै छेलै, केन्हें कि हुनको भेष-भूषाहै हेनौं छेलै, जे रं मुसलमान खलीफा के होय छै।”

“आय? तबें की होलै?” तेतरी तुरत पुछलें छेलै।

“होतियै की। भगवान जगन्नाथ नें वहाँकरो राजा के सपना में सब बतैलकै आरो राजां तुरत मंदिर में हुनको प्रवेश के आदेश जारी करैलकै। हेने छेलै गुरु नानक देव। बाद में सब कुछ सें संन्यास लैकें हुनी रावी नदी के किनारी पर जीवन बिताना शुरू करी देलकै आरो वहीं हुनी ई माँटीवाला देह तेजी देलकै। जानै छैं तेतरी, हुनी अपनौं गुरुवाला गद्दी अपनौं बेटा कें नै दै कें, अपनौं एक चटिया कें सौंपी देलकै जेकरौं नाम लहणा छेलै आरो वही सिक्ख पंथ के दोसरो गुरु बनलै। तबें हिनको नाम अंगद देव होय गेलै। है नाम गुरु नानके जी के देलौं छेलै।

“गुरु अंगद देव तें रहैवाला भारत के पंजाबवाला फिरोजपुर के छेलै आरो भगवती माय के घोर भक्त। बाद में हिनी नानकदेव सें मिलै लें करतारपुर गेलै, तें हुनको व्यक्तित्व सें प्रभावित होय कें हुनके शिष्य बनी गेलै। गुरु बनला के बाद गुरु अंगद देव अपनौं गाँव खडूर आवी गेलै, जैठां हुनी अपनौं सौंसे जीवन बितैलकै। पंचु, जानै छैं करतारपुर कहाँ छै—आयको पाकिस्तानवाला पंजाब में, जे रावी नदी के किनारी बसलौं छै। हम्मैं वहु जग्घों पर गेलियै। करतारपुर में नानकदेव के स्मृति में बनलौं गुरुद्वारा छै आरो रावी नदी के बात उठलै, तें हम्मैं घुमते-घुमते वहुं ठियां गेलियै—जोन ठियां गुरु अर्जुनदेव के स्मृति में बनलौं गुरु डेरा साहब छै—हिनका विधर्मी बादशाह नें वहीं शाही किला के नगीच रावी नदी में फेकवाय देलें छेलै। ऊ असथान लाहौर में छै आरो करतारपुर सें लाहौर छवे करै कत्तें दूर! बस एक सौ चालीस किलोमीटर।”

कहै के तें काकां ई सब कही गेलै मतर कहला के बाद काकां देखलकै, तें देखै छै सबके चेहरा के खुशी हठासिये उड़ी गेलौं छै। काका कें लगलै ओकरा सें भारी भूल होय गेलै। नदी में फेकवाय के बात बच्चा-बुतरू कें नै बताना चाहियौं। ई सोचथैं हुनी तुरत कहलकै, “मतुर विधर्मी कें की मालूम कि पहुंचलौं योगी-फकीर कहुँ की मरै छै, भले हुनका गरम ताबा पर चढ़ावौं, कि धिपलौं लोहों सें दागों कि नदिये में

कैन्हें नी फेकवाय दौ। गुरु अर्जुनदेव के देहों सें ज्योति निकललै आरो सीधे ज्योति मे मिली गेलै।” काकां सरंग दिस मुँह करी हाथ जोड़तें कहलकै।

सचमुच काका के ज्योति सें ज्योति मिलैवाला बातों के असर तेतरी सें लै कें पंचु-बंटुओ पर हेनों छेलै कि सबके चेहरा पर फेनु सें वही चमक आवी गेलै; जेना पैसा सें भरलौं-हेरैलौं बटुआ मिली गेलौं रहे। तें काकाहीं अपनों बात कें आगू बढैतें कहलकै, “तोरसिनी कें, है बतैये लें भूली गेलियौं कि हौ सब ठियां जाय में फकीर बाबा कभियो हमरा सें अलग नै होलै। खाली यही बोलै—जबें तोरा तरण-तारण पहुँचाय देवों, तबें हम्में फेनु लाहौर लौटी ऐवै। हुनी जहाँ-जहाँ हमरों साथ जाय—सब कुछ बतैलें जाय। हुनकै सें हम्में जानलें छेलियै कि तरण-तारण नगर गुरु अर्जुन देवे के बसैलौं नगर छेकै, जहाँकरो आश्रम में कोढ़ी सिनी के सेवा होय छै, अभियो होतें होतै। गुरु अर्जुन देव पाँचमों गुरु छेलै आरो हिनिये गुरुग्रंथ के संपादन करलें छेलै। है काम हिनी चौदह सालों में चौदह सौ तीस पन्ना के ग्रंथ कें गुरुमुखी लिपि में लिखी कें पूरा करलकै। लिपि बुझै छैं, तेतरी?”

तेतरी नकार में अपनों मुड़ी दू दाफी दायां-बायां करी देलें छेलै।

“अक्षर के रूप। अंग्रेजी अक्षर के रूप अलग होय छै, उर्दू अक्षर के अलग। हिन्दी अक्षर जेना देवनागरी कहावै छै; होनै कें पंजाबी अक्षर गुरुमुखी कहावै छै।”

“ओ!”

“तें, गुरु अर्जुन देव जी नें गुरुमुखी में ग्रंथ कें लिखैलकै। ऊ ग्रंथ करतारपुर में अभियो धरलौं होलौं छै। हिनी अपन्हौं बहुत अच्छा कवि छेलात आरो जेन्हों कि तोरा सिनी कें बताय चुकलौं खियौं कि अमृतसर मे स्वर्ण मंदिर हिनके बनवैलौं छेकै।”

“तबें तें हिनी ठेरे काम नी करलें छेलै, काका!” बंटु पुछलें छेलै।

“यै में की शक। तबें गुरु अंगद देव जी के काम भी कम नै छै। ऊ फकीर बाबां ही बतैलें छेलै, कि अपनै गुरु नानक देव के पद सिनी जहाँ-जहाँ आरो जेकरों-जेकरों लुग पड़लौं छेलै, हिनिये एक ठियां इकट्टा

करवैलें छेलै। एतन्है नै, अपनों गुरु के जीवन सें संबधित सब कथा-घटना कें शारदा लिपि में लिखवैलकै। आबे है नै बुझिहैं कि शारदा लिपि कोय अलग लिपि छेकै। ई वही छेकै जेकरा गुरुमुखियो कहलौ जाय छै। चूँकि गुरु के पद शारदा लिपि में ऐलै, तें ऊ गुरुमुखी भी कहलैलै। हिनियो पहुँचलौ कवि छेलै। गुरुग्रंथ साहिब में हिनको बौंसठ पद संकलित छै।

“तें की गुरुग्रंथ साहिब में खाली सिक्ख गुरुवे के कविता सिनी छै, काका?”

“नै-नै। सिक्ख पंथ के दस गुरु के पद कें बादो ई ग्रंथ में कबीर रविदास, जयदेव, मीराबाई आरनी के पद सब संकलित छै।”

“ओ! तें आरो की-की बतैलें छेलौं, ऊ फकीर बाबां?”

“ढेर-ढेर। मतर ई आयको बात थोड़े छेकै। आय सें साठ-पैंसठ साल पहिलको बात छेकै। आधों सें अधिक तें भुलियो चुकलौ छियै। हुनी बहुत कुछ आरो बतैतियै मतर तब तांय फरीदपुर के सीमा पर आवी गेलौ छेलियै, तें हुनी कहलें छेलै, ‘आबें तोहें भारत के सीमा में छौं आरो अमृतसर के एकदम नगीच। आबें तोरा आबै-जाय में कोय रोक-छेक नै होथौं। तोहें जा!’ हम्मैं हुनको गोड़ छूवी कें प्रणाम करलें छेलियै आरो अपनों वही झोला संभालनैं अमृतसर दिस बढी गेलियै। मतर हौ फकीर कें कन्हौ नै भूलें पारलियै। आय तांय नै। हों अमृतसर लौटला के बाद हमरा डुबकी के भी बहुत ख्याल ऐलै कि जों ई हमरों साथ होतियै, तें सौंसे पंजाब की, पटना तांय घुमिये कें घोर लौटतियै।”

कि तखनिये डुबकी जोर के चिग्घाड़ मारलें छेलै। काकां घुमी कें देखलकै, तें दौड़ी कें ओकरों लुग पहुँची गेलै आरो ओकरों मुँहों सें आमों के कर्रों टहनी हौले-हौले बाहर निकाली लेलकै, फेनु टुकड़ा-टुकड़ा करलौ केला के पत्ता साथे थंभ ओकरों आगू में रखी कें लौटी ऐलै। बैठतें-बैठतें बोललै, “भूख लगला पर कोय कड़ा-कोमल के कुछ ख्याल करै छै की। खाय लै छै आरो पेट बिगाड़ी लै छै। यही सें एकरों खानाहो पर ध्यान रखै लें लगै छै।”

“अच्छा काका, माय बोली रहलौ छेलै कि हाथी शृंगार-पटार करी कें बीहा-शादी में नाचवो करै छै। की सहिये में?” तेतरीं अपनों बालों कें संवारतें बोललै।

“है केन्हौ कें हुए पारें की? एते भारी भरकम देह! भला नाँचें पारतै की! तबें नाँचे के नाम पर सूँढ़ ऊपर-नीचे, हिन्नें-हुन्नें ही थोड़ों गोड़ उठावे पारें। हों दौड़ करें पारें। जहाँ तक शृंगार-पटार के बात छै, ऊ तें होय छै। तेतरी, तोरा जानी कें आचरज होतौ कि अपनों देश के राजस्थान के जयपुर जिला में हर साल, ठीक होली के अवसर पर, हाथी महोत्सव होय छै; तबें हथिनी सिनी कें खूब शृंगार-पटार करलौं जाय छै। कपार सें लैकें सूँढ़ तक रंगों सें सजैलौं जाय छै। हथिनी सिनी के गोड़ों के लौं काटलौं जाय छै। ओकरों मॉन लायक किसिम-किसिम के ओकरा खाना खिलैलौं जाय छै, तबें ऊ सब दौड़ के प्रतियोगिता में भागो लै छै। है हाथी महोत्सव विश्व हाथी-दिवस, जे पच्चीस सितम्बर कें मनैलौं जाय छै, ओकरा सें अलग होय छै। अरे बंटु तोहें कुछ हाँ-हूँ नै बोलै छें। कुच्छू तें बोलै।” काकां पीछू घूमतें बंटु कें माथा पर हाथ फेरतें पुछलें छेलै, ते ऊ बोललै, “काका, महोत्सव में खाली मेदनीये हाथी भाग लै छै, नर हाथी नै?”

“असल बात छै, बंटु, कि मेदनी हाथी नर हाथी सें बेसी अनुशासित होय छै; नर हाथी सें बेसी शांत। तोरा ई जानी कें आचरज लगतौ कि झुंड में जे हाथी चलै छै, तें सब किस्म के निगरानी लेली झुंड के आगू में कोय बुजुर्ग मेदनीये हाथी रहै छै आरो पिछुवो भी। हों, संकट के समय नर हाथी जरूरे आवी जाय छै।” आरो एतना कही काको तेतरी दिस घुमतें बोललै, “तें हम्में हाथी महोत्सव के बारे में बताय रहलौं छेलियौं—है जानी ले—ई खाली अपने देश मे नै, अपनों देशों सें बाहर थाइलैंड में भी हाथी सिनी कें एतवारे-एतवा भोज देलौं जाय छै। खूब लम्बा टेबुल पर हाथी के मनपसंद के केला, साग-सब्जी, पत्ता रखलौं जाय छै आरो सौ सें लैकें दू सौ हाथी भोज में शामिल होय छै। आखिर केन्हें नी ई हुए; हाथी थाइलैंड के राष्ट्रीय पशु जे छेके। हेना कें तें अपनों राज्य सें सटले झारखंडो में हाथी राजकीय पशु घोषित छै मतर थाइलैंड में हाथी के बड़ी मान-सम्मान छै।”

“ऊ केन्हें काका?” पंचुं, बंटु कें जरा हटैतें पुछलें छेलै ।

“तोरा बतैलें छेलियौ नी, बुद्ध के जनम के पहिले बुद्ध के माय माया देवीं सपना में देखलकै, कि एक सफेद हाथी ओकरों कोखी में

प्रवेश करी रहलौं छै। तें, जानी लें थाइलैंड में बुद्ध के बड्डी सम्मान छै; यही सें हाथियो के बड्डी सम्मान छै....अरे, तोरासिनी कें है बताय लें भुलिये गेलियौ, कि डुबकियो के हर साल जनमदिवस धूमधाम सें मनैलौं जाय छै।”

“ई अपनों डुबकी हाथी के?” तेतरीं घोर आचरज सें पुछलें छेलै, “काका तोहें ई केना जानलौ कि एकरो कहिया जनम होलौं छेलै?”

“बाबू-हाथे जे एकरा बेचलें छेलै, वहीं एकरों जन्मदिनो बाबू कें बतैलें छेलै। बाबू जनमदिवस मनाय छेलै, तें हम्मू मनाय छियै। फेनु कल्हे तें एकरों जनमदिनो छेकै। कल एकरा रजौन लै जैवै। वहीं एकरों शृंगार-पटार होतै, फेनु वहीं ठियां सें यें दक्खिन दिस घूमी सूँढ़ उठैलें बौंसी के भगवान मधुसूदन कें प्रणाम करतै; फेनु पच्छिम मुँह होय कें जेठोर बाबाओ कें; तबें उत्तर मुँह होय कें अजगैबी बाबा साथें बाबा बूढानाथ कें तबें पूरब होय कें बटेसर बाबा कें—ई सब होला के बादे घोरवाला गजभोग लेतै।”

“कहिया मनैलौं जैते डुबकी के जनमों दिन ?”

“तोरों ध्यान कहाँ रहै छौ, पंचु ? कहैलियौ नी, कल्हे छेकै। कल तोरा सिनी कें कोइयो कीमतों पर आना छै। तखनिये, जखनी भगवान सरंगों में पाँच हाथ ऊपर आवी जाय। तखनी तांय हम्मैं डुबकी के साथ जरूरे रजौनों सें लौटी ऐवै। कल एकरों जनमदिवस पर तीन-तीन सिक्ख गुरु के कहानीयो होतै। केन्हो रहतै?” काकां थोड़ों तनी कें बोललै।

“बड्डी बढियाँ; खूब बढियाँ।” मँहगी छोडी कें तीनो बच्चा एक्के साथ बोली पड़लौं छेलै।

“तें, ठीक छै, आयकों खिस्सा यही खतम। आय तोरा सिनी लें लड्डू, आम, लीची नै, कहलगँव के रसकदम मँगवैलें छियौं।” फेनु मँहगी दिस होय कें बोललै, “कल जे बाटी आनलें छेलें, वही में रसकदम छै। उतरबारी कोठरी में ढकलौं रखलौं छै। तेतरीं आय बेसी पुछले छै, एकरा दू रसकदम मिलतै। याद रखियै।”

मँगनी तीनो बच्चा साथें उठलै, तें कनौजियो काका उठी कें डुबकी के गोड़ों सें बंधलौं जंजीर खोलै लें बढी गेलै।

देर रात तांय तेतरी कें नीन नै ऐलै। कै दाफी माय के बगलों में सुतलों उकुसु-पुकुस करतें रहलै मतर कथी लें नीन ऐतै। दू-एक दाफी मांय डॉटवो करलें छेल, “आय तोरा होलों की छौ? पेटों में रसकदम उछली रहलें छौ की ?” माय के उस्सट-रं बोली सुनी कें वैं उकुस-पुकुस करवों तें छोड़ी देलकै मतर चाहियो कें वैं नीन नै लानें पारलकै। लै दै कें आँखी में एक्के दिरिश घूमै कि डुबकी के ललाट पीरों-उजरो रंगों सें रंगलों छै; ऊ सूंड उठाय-उठाय कें; कभियो कटि-कटि अगला टांगो उठाय कें शंखे नाँखी बोली उठै छै आरो फेनु एक्के दाफी में आगू के दर्जन भरी केला सूँडे में समेटतें मुंहों में रखी लेलें छै। ई सब सोचतैं ऊ कखनी सुतलै आरो कखनी उठलै—केकरो नै पता लगलै।

भारे ओकरी मांय उठलै, तें बिछौना पर तेतरी कें नै देखी कें मिजाज धक-सना रही गेलै। धडपड़ाय कें ऐंगनों ऐलै, तें देखै छै तेतरी अपन्है सें चूल थकरवों करी रहलें छै, तें हँसतें हुएँ तेतरी-माय ऐंगनों सें बाहर होय गेलै।

अभी भगवान सरंगों में पाँच हाथ उठलो नै होतै कि दस हाथ आगुवे होलें तेतरी काका के बखारी पर पहुँची गेलै। पंचु आरो बंदू अपनों बाबुए साथे-साथे बखारी पर ऐलों छेलै।

आय डुबकी के रंगे-रूप बदली गेलों छेलै। घोरलों लाल, पीला, नीला गुलाल सें ओकरो मारथों सें लैकें आधों सूँढ़ कमल के पत्ता के नक्शा सें सजैलों गेलों छेलै। कंठों में मुलायम रस्सा सें बंधलों छोटों-छोटों घुंघरू आरो सबसे नीचे एक घंटी के आवाज सें डुबकी आय कुछ बेसिये आगू-पीछू होय रहलें छेलै। एतन्है होतियै, तें होतियै, आय काका ओकरो चारो गोड़ों में बड़ों-बड़ों घुंघरूवाला पायलो बान्ही देलें छेलै।

“डुबकी तें आय ऐरावत हाथी नाँखी शोभी रहलें छौं, दादा!”

“आय की, मँहगी; हमरो लेली तें कभियो ऐरावत सें कम नै रहलै।”

“एकरो दाँत बड़ों-बड़ों होतियै, ते आरो अच्छा लगतियै। की

काका?"

“मेदी छेकै नी। मेदी हाथी के दाँत छोटों होवे करै छै। फेनु अपनों दोनो बित्ता के अंगुठा मुँहो के कासों सें सटेतें बोललौं छेलै, “जों नर हाथी होतियै, तें हाथ-हाथ के एकरो दाँत होतियै” आरो एतने कही हाथीभोग दिस इशारा करतें कहलें छेलै, “आय डुबकी के खाना में बेसन के दस लड्डुओ छै। जन्मदिवस नी छेकै। ई खुशी में हमरो सिनी आय कुछ खास खैवै। अंदाज लगाव कि हमरों सिनी वास्तें की हुएँ पारें? अच्छा बंटू तोहें ई बताव, कि अपनों अंग प्रदेश के खान-पान में की-की नामी छै?”

“करुआ मोड़ के पेड़ा।” बंटू झट सना बोली पड़लै कि कहीं कोय बोली न दें।

“ऊ तें याद रहवे करतौ आरो दोसरो?” काका के पुछला पर वें तेतरी दिस देखलें छेलै।

“तेतरी दिस कोय नै देखें। तोहें बोल पंचु—अंग प्रदेश के नामी खान-पान?”

“बौंसी के गुडझिलिया।”

“ई होलै नी। बौंसी के मुरियो-घुँघनी कम नामी नै छै। आरो कुछ?” तें पंचुओ तेतरी दिस देखें लगलै।

“पढ़लें छैं—बंटा आरो दुक्खीं कें। पढ़ें जाय कें—‘बंटा’ आरो ‘सात समंदर तेरह नदी’। दोनो किताबों के दोनों छौड़ा कत्तें तेज छै आरो एक तोरा दोनो भाय! अच्छा तें तोंही बताव, तेतरी!”

तेतरी तें चाहिये रहलौं छेलै, कि काका सबसे पहिले ओकरे सें पूछें, तें ऊ रटलौं पाठ नाँखी बोली पड़लै, “कजरेली के लालशाही; घोड़मारा के पेड़ा; अमरपुर के गट्टा; नाथनगर के बालूशाही-जिलेबी आरो कलहगाँव के रसकदम।”

“कमाल ! कमाल ! कमाल करी देलें ! मतर है सब तोहें जानलें केना?” काकां अपनों आँख बड़ों-बड़ों करतें पुछलकै ।

“माय-बाबू बैठी के गप करै छै नी, वांही सें।”

“तें कल तोरों लें नाथनगर के बालूशाही आरो जिलेबी एकदम ऐतै। लालशाही तें हम्मी जाय कें लै आनवै। तबें देखवै—के कत्तें उड़ावें पारै छैं। इखनी तें वहा चलतै, जे डुबकी लै रहलौं छै।”

“की घास-फूस, काका ?” तेतरी बोललै ।

“अरे, नै गे । शुद्ध घी में भुजलों बेसन के लड्डू । बंटू ऐंगनों जो आरो जॉन घरों के केबाड़ी खुल्ला होथी, वही में घुसीकें थरिया उठाय लानें—लड्डूवाला थरिया ।”

काका के कहला पर बंटु पंचु कें देखलें छेलै—मतलब साफ छेलै कि ‘तहूँ साथ चल; असकल्लों थरिया नै उठतौ ।’

कटी-टा देर होना छेलै, कि तेतरी उठलै आरो ऐंगनों दिस दरबनियां दै देलकै । हुन्नं सें लौटलै, तें ओकरो माथों में थरिया छेलै, जेकरा वैं दोनो हाथों सें धरलें कल्हे-कल्हे डेग मारलें लौटी ऐलों छेलै ।

“है तें हाथी के मुँह लायक लड्डू बनवलें छौ, दादा । आधो लड्डू पार लगना मुशिकल ।” मँहगी मुस्कैतें बोललै ।

“की होतै । टोला के अपनों लोगों के बीचों में बाँटी दियें । तोरा घरों के काम छौ, मँहगी, तें जावें पारें । हम्मे तीनो कें घोर छोड़ी ऐभौ ।”

“नै दादा । गुरुजी के कहानी तें हमरौ सुनना छै । वही लोभें सब काम-धाम छोड़ी कें आवी जाय छियै । आबें गाँमों में होन्हौ कें सतसंग कहाँ होय छै !”

“से तें ठिक्के । होना कें मॉन बदली गेलों छेलै मतर आबें सुनैवै ।” ई कही कें काका बंटू दिस मुँह करतें कहना शुरू करलकै, “खूब मॉन लगाय कें सुनियें, बंटु । गुरु अमर दास के कहानी तोरों वास्तें आरो जरूरी छै ।” फेनु तेतरी दिस होतें कहें लगलै, “गुरु अमर दास जी सिक्ख-पंथ के तेसरों गुरु छेलै, जिनकों जनम अमृतसर के वासरके गाँव में होलें छेलै । बड्डी धार्मिक । अपनों गाँव सें पैदले हर साल हरिद्वार जाय—गंगा असनान लेली ।”

“अमृतसर सें हरिद्वार ! पैदले ?” तेतरीं हाथ-चमकैतें बोललै ।

“हों, तखनी उपाइयो की छेलै । रस्ता में आश्रम, संत-मुनि सें मिलतें-जुलतें पहुँची जाय । इक्कीस साल हुनी हेनों करतें रहलै । ई संयोगे कहों कि गुरु अनंग देव के बेटी अमरो के बीहा गुरु अमर दास रों भतीजा सें होय गेलै, तें जबें अमरो अपनों ससुराल ऐलै, तें ससुरारी में मौका बेमौका गुरुवाणी गैतें रहै, जे सुनी कें अमर दास जी एतै प्रभावित

होलै कि हुनी गुरु अनंग देव के गाँव खंडूर साहिब पहुँचीं गेलै, आरो हुनकों शिष्य बनी गेलै। तखनी अमर दास के उमिर बौसठ साल के छेलै आरो गुरु अनंग देव मात्र पच्चीस सालों केँ। तें जे ज्ञानी होय छै, गुरु होय छै, ओकरोँ उमिर थोड़े देखलोँ जाय छै। सोच्छें, गुरु अमर दास अपनों गुरु अनंग देव के नहावै वास्तें भोररिये चार बजे उठी केँ पैदले व्यास नदी सेँ घैलोँ भरी पानी लानै, जे खंडूर गाँव सेँ तीन कोस के दूरी पर छै। एक तोहें छैं, बंटु, कि बाँस भरी के दूरी पर कोठरी में रखलोँ थरियो नै लानें पारले। गुरु अमर दास के शिष्या ते तेतरीये नी बनें पारें बंटु! खैर जबें अमर दास जी तेहत्तर साल के छेलै तबें गुरु अनंग देवें हुनका गुरुगद्दी पर बिठैलकै आरो अपनों जिनगी के पनचौनवे वर्ष तांय अमर दास जी जीतोँ रहलै। हुनिये व्यास नदी के किनारा पर गोइंदवाल शहर बसैलें छेलै।” कहतें-कहतें काका के नजर पंचु पर पड़लै—ते पंचु सेँ बंटुओ पर—जे अपनों मुड़ी झुकाय केँ बैठलोँ छेलै।

बात केँ समझतें काकां तुरत बंटू सेँ कहलें छेलै, “जाचै छैं, बंटु, गुरु अमर दास नेँ एक नियम बनैलें छेलै, लंगर में सब एक साथ बैठीकेँ खाना खैतै। बड़ों-छोटों, ऊँच-नीच के कोय बात नै आरो जे ई बात केँ नै मानतै, ऊ हुनका सेँ नै मिलें पारें, भले ऊ राजाहे; बादशाहे कैन्हें नी रहें। यही कारण जबें तखनिकोँ बादशाह अकबर व्यास नदीये होलें लाहौर जाय रहलोँ छेलै, तें गुरु अमर दास सेँ मिलै के इच्छा जाहिर करलकै। गुरु केँ खबर करलोँ गेलै, तें हुनी वही कहलकै, अकबर राजा छेकै तें की, पहले लंगर में सबके साथे-साथ बैठी केँ खाव, तब्हें हमरा से मिलें पारें आरो वहा होलै। सबके साथें बैठी केँ राजा अकबरें खाना खेलकै, तबें गुरु भेंटलै। आबें अगला गुरु के कथा तभिये भेटें पारें, जबें हमरोसिनी मिली केँ थरिया पर के लड्डू उठाय-उठाय केँ खाना शुरू करी दौं।” आरो ई कही केँ काकां बंटु के हाथों में पैला भर के बड़का लड्डू थमाय देलकै, तें बंटु के खुशी देखी केँ सब्भै खिलखिलाय पड़लै।

आय मँहगी अपनों बच्चा सिनी साथें नै आवें पारलै; कुछ कामे हेनों आवी गेलै। बारी में पानी के धार नै बहैतै, तें बीहन की रोपतै, से तेतरी, बंटु आरो पंचु कें कुछ दूर अरियाती कें आपने घोर लौटी ऐलै। एकरा सें तेतरी कें तें कोय फरक नै पड़ी रहलौं छेलै मतर पंचु आरो बंटु बड़ी खुश छेलै। होना कें आवें बगीचावाला आमों गाछी पर भले आम झूलतें रहें मतर रस्ता पर के आमों गाछी पर एक्को आम दिखाय शायते छेलै। कोय गाछों पर छेवो करलै, तें ओकरों नीचें लाठी लेलें जोगबारों जरुरे छेलै। भले गाछों पर आम नै रहें मतर ढेपों चलाय में माहिर पंचु गाछी पर देला नै फेकतियै, ई भला केना होतियै। काका रों मड़ैया जब तांय दू बाँस दूर नै रही गेलै, तब तांय हनियाय-हनियाय कें गाछी पर दोनो भाय ढेपों चलैतें रहलै।

एक ठियां तें एक गाछी के नीचें दोनो रुकवो करलौं छेलै, कैन्हें कि गाछी सें फुनगी पर कुछ आम लटकतें दिखलै, फेनु की छेलै बंटु; पंचु के धौनों पर लात रखी गाछी के मजगूत ठहार पकड़लकै आरो सीधे दोसरो ठार पर लात रखी कुछ आरो ऊपर चढ़ी आमों दिस हाथ बढैलें छेलै मतर दुर्भाग्य कहों कि हुन्नें सें जोगवारो के आवाज होलौं छेलै, तें बंटु सीधे नीचें कुदकलै आरो दोनो लगे छड़पनियां काका के मड़ैया पहुंची गेलौं छेलै।

जबें दोनो नें, तेतरी कें काका साथें ऐतें देखलकै, तें दोनो एक दूसरा के मुंह ताकतें एकदम्मे सकड़दुम होय गेलै। दोनो यहाँ सोचलकै कि तेतरीं जरुरे सब बात बताय देलें होतै।

“अरे, डरै के की बात छै। काका केकरो डँटै या मारै थोड़े छै। आय तक तें हुनका केकरो, कोय गलती पर डपटतें नै देखलें छियै।” बंटु पंचु कें ढाढ़स बँधैतें कहलें छेलै।

“तोहें नै समझबैं। हुनी कहानीये सें हेनों बात कही दै छै कि बुझैवाला बुझी जाय छै। तेतरीये पहिलें आवी गेलै आरो हमरा सिनी इखनी। काका कें लाल बुझकड़ समझें। हुनी सब कुछ समझी गेलौं होतै।” पंचु अभी आरो कुछ बोलतियै कि वैं ओकरों पीठी में चुट्टी काटतें

चुप रहै के इशारा करलकै ।

“आवी गेलैं । आय तेतरीं तोरा दोनो कें पिछुवाय देलकौ नी । कोय बात नै । आय तोरा सिनी कें अपनों बैलगाड़ी पर बिठाय कें अपनों बगीया घुमैवौ । पत्ता भर भी रौद नै मिलतौ । आय गाड़िये पर कथा-कहानी चलतै आरो गाड़िये सें घोर पहुंचाय ऐवौ । केहनो रहतें बंटु?” काकां आँख बड़ों करतें मुड़ी हिलाय-हिलाय कें कहलें छेलै ।

“बड़ी बढियां, काका ।”

“तें, तोरा तीनो यहीं रहें । बैलो कै दिन सें घुमलों-घामलों नै छै, यही बहाना घुमी लेतै । तुरत आवै छियौ ।” कही कें काका गेलै आरो कुछुवे देरी में बैलगाड़ी पर बैठलों, बैलों के पैनों सें हें-हें हाँकतें ऐतें दिखलै आरो ठीक तीनो सें दस हाथ दूरे गाड़ी रोकी देलकै । गाड़ी रुकना छेलै कि बंटु आरो पंचु चक्के पर लात धरतें छलांग मारी-मारी गाड़ी पर जाय बैठलै मतर तेतरी गाड़ी के पीछूवाला हिस्सा पर केहुनी बल्लें चढ़ै के कोशिश करें लगलै, जे देखी काका झट-सना नीचें उतरलें छेलै आरो तेतरी कें उठाय कें अपनों पीछू बिठाय देलै छेलै । आपन पहिया के सहारा लै गाड़ी के आगू बैठी रास पकड़ी लेलकै ।

“काका, गाड़ी की जोरों सें चलतै?” तेतरी दोनो हाथों सें गाड़ी के दोनो दिसवाला बाँस कें पकड़तें बोललै ।

“जोरों सें चलतै तें की । देखैं नै छैं—कर्तें मोटों पुआल के गद्दा-गेंदरा नीचें बिछैलों छै । टप्पर लगाय दियै, तें सब समझतै, कोय मेला देखै लें जाय रहलें छियै ।” एतना कही काकां बैलों कें टिटकारलें छेलै ।

बैलगाड़ी हौले-हौले आगू बढ़े लगलें छेलै आरो काका के कहानियो ।

“अच्छा बंटु, तोरा सें एक बात पूछै छियौ कि जीवन में लोभ-लालच, हाही के परिणाम अच्छा होय छै, की खराब? आदमी कें लड़तें-झगड़तें जिनगी काटना चाही कि शांति से?”

काका के बात सुनथें पंचु गौर सें बंटु कें देखलें छेलै; जेना कहतें रहें—देखलें नी, कहलें छेलियौ, कि काकां घुमाय-फिराय कें गलती उगलवैय्ये देतौ । आबे दें जवाब ।

मतर बंटु कुछ नै बोललौं छेलै। नै बोललो छेलै, तें काकाहौं दोबारा नै पुछलें छेलै आरो सीधे गुरु अर्जुन देव के याद दिलेतें कहलें छेलै, “हुनकों साथें बादशाह जहाँगीर नें अच्छा बर्ताव नै करलकै, तें तोरा सिनी जानै छै—एकरों परिणाम की होलै। हौ परिणाम के बारे में तें जहाँगीरें सपनाहौं में नै सोचलें छेलै।” ई बात काकां हेना कहलें छेलै कि सब्भे के ध्यान हुनके ओर होय गेलै।

काका यही देखै लें घुमलो छेलै कि बच्चा के ध्यान कन्नें छै आरो ई देखी कें कि सब्भे हुनके दिस मुँह करलें होलौं छै, कहना शुरू करलकै, “गुरु अर्जुनदेव के इकलौता पुत्र हरगोविन्द जखनी गुरुगद्दी पर बैठलै, तखनी हुनकों उमिर मात्र एगारह साल के छेलै मतर सब बातों कें जानी रहलौं छेलै कि बादशाहें केना ओकरों बाबू कें बंदी बनाय कें लै गेलौं छेलै। नतीजा ई होलै कि गुरु हरगोविन्द जी धार्मिक ज्ञान तें देवे करै पर बेसी हुनकों ध्यान सेनाहै तैयार करै पर रहें लागलै। सेना समझै छैं तोरासिनी ? सेना मानी, सिपाही सिनी के जेरों, जे देश या समाज के रक्षा लेली होय छै। पहिले जे शिष्य होय छेलै ऊ अपनों गुरु वास्तें धन-दौलत कपड़ा-लत्ता लानै छेलै; आबें जे शिष्य आवै, ऊ तलवार, भाला, कटार आरनी के साथें घोड़ा गुरु कें भेंट करै लें लानै। कैहिने कि गुरु हरगोविन्द जी के हेने आदेश छेलै। हिनी अपनों शिष्य सिनी कें तलवार आरनी चलावै के तौर-तरीको बतलाना शुरू करलकै। नतीजा ई होलै कि हिनकों पास एक बड़ों सेना होय गेलै। हिनी अमृतसरे में लौहगढ़ नाम के किलाहौ बनबैलकै। हिनकों जन्मो अमृतसर के बडाली क्षेत्र में होलौं छेलै। एक किस्म सें है बताय लें गुरु हरगोविन्द दिल्ली के बादशाह सें कम नै छै, हिनी वहा स्वर्णमंदिर के सामनें अकाल तख्त नाम सें एक सिंहासन बनवैलकै जे अभियो छै।...कोन तखत बनवैलकै ?”

“अकाल तखत ।” तीनो एक्के साथ बोललौं छेलै ।

“एकदम ठीक । तें, जानै छौ, गुरु हरगोविन्द जी है सब कैन्हें करी रहलौं छेलै ? कि तखिनको मुगल बादशाह जहाँगीर है घोषणा करलें छेलै—कोइयो प्रजा दू फूट सें उच्चों चबूतरा आसन के नाम पर नै बनावें पारें आरो कोइयो घुड़सवारी नै करें पारें। जबें बादशाह कें गुरु द्वारा शिष्य के सैनिक-प्रशिक्षण घुड़सवारी आरो अकाल तख्त के बारे में मालूम

होलै, तें ऊ बौखलाय गेलै आरो गुरु जी कें बंदी बनाय कें ग्वालियर के किला में बंद करी देलकै।”

“जा!” पंचु के मुँहो सें निकललौं छेलै।

“ई ग्वालियर कहाँ छै काका?” बंटू पुछलें छेलै।

“तें, गुरु जी के सेना कुछ नै करलकै?” तेतरीं पुछलें छेलै।

काका घूमी कें तीनो कें देखलें छेलै। हुनी खुश होलौं छेलै कि तीनो मॉन लगाय कें सब कुछ सुनि रहलौं छै, तें हुनी कहना शुरू करलकै, “केना नै करलकै। गुरु जी कें बंदी बनाना छेलै कि हुनको सेना में हेनो खलबली मचलै कि बादशाह कें ग्वालियर के किला सें बाहर करै लें लगलै। ई ग्वालियर अपने देश के मध्यप्रदेश राज्य में छै।”

“ओ!” बंटू संतोष के स्वर में बोललै।

“मतुर गुरु आरो बादशाह के बीच लड़ाय रुकैवाला थोड़े छेलै। गुरु हरगोविन्द के जे रं नाम बढ़लौं जाय रहलौं छेलै, एकरा सें जली कें जहाँगीर के बाद शाहजहाँ बादशाह नें गुरु कें बंदी बनाय लें एक सेनापति कें भेजलकै मतुर गुरु जी के सेनां ओकरा मारीये तें देलकै, तबें ओकरो सेनाहौ कें भागै लें लगलै। दोसरो दाफी गुरु जी के शिष्य आरो बादशाह के लोगो के बीच एक बाज लैकें ताना-तानी होय गेलै। होलै तें खूब होय गेलै।” काकां दायां घुस्सा बायां तरस्थी पर जमैतें बोललै।

कि तखनिये पंचु काका दिस इशारा करी तेतरी के कानो में कुछ फुसफुसैलौं छेलै आरो तेतरीं हेनो नै करै लें अपनो दायां हाथ लगातारे डोलैलें छेलै। फेनु एक हाथ कें कान के नगीच लानतें मुड़ी हथेली दिस झुकैलें छेलै, जेकरो मतलब ‘बाद में’ होय छेलै, तें पंचुओ चुप बैठी रहलै।

काकां बिना पीछू देखले बात आगू बढ़ैतें कहतें गेलै, “बादशाह शाहजहाँ कें लगे लगलै—जो गुरु कें नै रोकलौं गेलै, तें मुश्किल हुए पारें, से वें फेनु एक सेनापति कें भेजलकै—गुरु कें बंदी बनाय लें। मतुर गुरु के सेनां ओकरौ मारीये तें देलकै। ई देखी बादशाह के सेना सिनी लगे उड़ैन दै देलकै।” काकां दोनो हाथ ऊपर करतें कहलें छेलै।

जे सुनथें तेतरी, पंचु आरो बंटू नें जोर-जोर सें थपड़ी बजैलें छेलै। काकाहौं खुश होतें कहलकै “ओकरो बाद बादशाह के जोशे पातरों

होय गेलै। तबे गुरु जी करतारपुर चल्लो गेलै। तोरासिनी के मालूम छै नी, करतारपुर कहाँ छै आरो कौन गुरु के निवास असथान छेकै?”

अभी बंटु आरो पंचु याद करै लें माथो नोचिये रहलौ छेलै कि तेतरी बोली पड़लै, “गुरु नामक देव के असथान; जे पाकिस्तान में छै।”

“वाह गे बेटी, कमाल के बुद्धि पैलें छैं! मतर गुरु हरगोविन्द जी वहुँ नै रुकलै आरो हुनी सीधे कीरतपुर आवी गेलै, जे आयको पंजाब के रूपनगर जिला के एक गाँव छेकै। हिनको पाँच बेटा में गुरुदत्ता सबसे बड़ो बेटा छेलै, जेकरे दू बेटा में से हरिराय के हरगोविन्द जी गद्दी सौंपी के ज्योति में विलीन होय गेलै।” एतना कहथे काका मुँह घुराय के बंटु से पुछलें छेलै, “गुरुदत्ता गुरु जी के बड़ो लड़का छेलै आरो हरिराय गुरुदत्ता के बेटा ?” तें रिस्ता मे ऊ हरगोविन्द के की लगलै?”

“पोता।”

“वाह। एकदम सही। तें, गुरु हरगोविन्द जी ने पाँचो बेटा में से केकरौ गद्दी नै दै के पोता के दै देलकै। पंचु बतावें पारें—कैन्हें देलें होतै?”

“गुरु जी बेटा सिनी के पसन्द नै करते होतै।”

“तेतरी, तोहें बताव; की कारण होतै?”

“ऊ सब गद्दी लायक नै होतै।” तेतरी थोड़ो सकपकैते बोललौ छेलै।

“एकदम ठीक बोललें। मतर पोता अपनो दादा के सोभाव से अलग निकललै—एकदम शांत स्वभाव के। कोय किसिम के झंझट से कोय मतलब नै। यै लेली हिनी सैनिक के संख्या घटाय देलें छेलै। हिनी दादा नाँखी शिकार पर तें जाय मतर जीव के मारै नै। घोर लानी पालै-पोसै। हिनको हृदय कते कोमल छेलै, तोरासिनी जानै लें चाहवें?”

जबे सब्भे एके साथे ‘हो’ कहलकै, तें काका रास खीची के बैलो के रोकलकै आरो एकोसी होतें कहें लगलै, “एक दाफी हिनी बगीचा में घूमी रहलौ छेलै, तें हिनको कमीज से उलझी के कुछ फूल टूटी के गिरी पड़लै। फूल के गिरथे हिनी काने लगलै। जानै छें बंटु, कैन्हें?”

“कैन्हें?” बंटु आचरज से पुछलें छेलै।

“है रं गिरला से फूल सिनी के कते चोट लगलौ होतै—यही

सोची कें ।”

ई सुनी कें सब अवाक रही गेलों छेलै ।

कि तभिये बंटु दिस देखतें काकां कहलें छेलै, “तबें सोचैं, जबें गाछी पर हनियाय-हनियाय कें डेपों चलैतें होवैं, तें गाछ के पत्ता-फॉर कें कर्तें चोट लगतें होतै । गाछी कें लगै छै, ऊ तें अलग, जों ऊ डेपों केकरो माथा सें लगी जाय, तबें की होतै । बच्चा में जे गलती हम्मैं करै छेलियै, ऊ जल्दिये सुधारियो लै छेलियै ।” कही के काका एक क्षण रुकलें छेलै आरो बंटुए सें फेनु पुछलें छेलै, “की तोहें देहरादून के नाम सुनले छैं ?” बंटु ‘नै’ कहलकै, तें सब्भैं एकेक करी कें ‘नै’ कही देलकै ।

“देहरादून हिमालय परकों जग्घों छेकै । ई नाम कैन्हें पड़लै, ई तें बाद में बतैवौ; पहले ई जानी ले—बादशाह शाहजहाँ के मरला के बाद ओकरो बेटा सिनी में गद्दी लें मार हुएँ लगलै । शाहजहाँ के एक बेटा औरंगजेब भी छेलै, जे चाहै छेलै कि गुरु कें केन्हों कें मुसलमान बनाय देलें जाय; तबें जत्तें भी गुरु के लड़ाकू शिष्य छै—सब मुसलमान होय जैतै, से औरंगजेब नें गुरु हरिराय जी कें दिल्ली बोलैलकै । गुरु तें नै गेलै मतर हुनकों बेटा रामराय वहाँ चल्लों गेलै, वहाँ ओकरो खूब खातिरदारी करी कें मोन-मिजाज बदली देलें गेलै; यहाँ तक कि गुरु नानकदेव के एक पद के अरथ बदली कें ओकरो दोसरो अर्थ बताय कें बादशाह औरंगजेब कें खुश करी देलकै । जबें है बात गुरु हरिराय कें मालूम होलै, तें हुनी बेटा लुग खबर भिजवाय देलकै कि मरला के बादो ऊ हमरो मुँह नै देखें । ई बात सुनी कें बेटा कें बड़ा दुख होलै आरो हिमालय के तराई में जाय कें अपनों डेरा बनाय लेलकै, जे असथाने बाद में देहरादून कहलैलै—डेरा मानी जग्घों आरो दून मानी दोना, दू पहाड़ों के बीच के असथान । बड़ों होभे, तें जरूर जैइयें ऊ जग्घों । की रमणीक जग्घों छै । जे हुएँ, एकरों बाद गुरु हरिराय नें अपनों छोटका बेटा हरिकृष्ण कें गद्दी सौंपी देलकै, जे हरिकृष्ण तखनी पाँचे सालों के छेलै....बंटु सोचैं, हरिकृष्ण पाँचे सालों के उमरी में गुरुगद्दी पर बैठलै । आरो जबें गद्दी पर बैठलै, तें हरिकृष्ण कें तंग करै में ढेर लोगें कोय कमी नै करलकै । बादशाह सें कही कें हुनका दिल्ली बुलाय कें साजिश रचैलकै मतर गुरु जी दिल्ली जाय ले तैयार नै छेलै । बाबू के सौगंध जे निभाना छेलै ।”

एतना कही काका रुकी गेलों छेलै; हौ तें तेतरी टोकलें छेलै, “काका, तबें की होलै ?” तें काका कहनाओ शुरू करलकै, “मतर अंबर के राजा जयसिंह के कहला पर हिनी सब शिष्य कें रोकी कें अपनी माय कृष्ण कौर आरो बीस शिष्य के साथें दिल्ली दिस रवाना होय गेलै। दुर्भाग्य देखें, तखनी दिल्ली में खूब जोरों सें शीतला माय के प्रकोप फैली गेलों छेलै। शीतला माय के माने समझैं छैं, तोरासिनी?”

“हों। बोदरी । चेचकवाला रोग।” पंचु बोललों छेलै।

“ठीक कहलैं। हजारो-हजार आदमी पटापट मरें लगलों छेलै। संकट में लोगों कें देखी गुरु हरिकृष्ण लोगों के सेवा में अपनों शिष्यों के साथ लगी गेलै। नतीजा ई होलै, कि हुनियो शीतला माय के शिकार होय गेलै। हुनी दिल्ली के जमुना नदी के किनारी अपनों डेरा जमाय ललकै। देखथें-देखथें हुनका खूब तेज बुखार आवी गेलै। जबें हुनका लगें लगलै कि आबें हुनको मिरतु नगीचे छै, तें हुनी तंबु सें बाहर निकली शिष्य सिनी के बीच पाँच पैसा के साथ नारियल फॉल रखी कें ओकरो परिक्रमा करतें कहलकै, ‘गुरु बाबा बकाले।’ हुनको कहै के मतलब छेलै कि बकालेवाला ही आबें गुरु होतै। आरो है कहीं कें गुरु हरिकृष्ण जी ज्योति में मिली गेलै। आय यमुना नदी के वही ठियां गुरुद्वारा बाबा साहिब बनलें होलें छै। तेतरी, सोचें जबें गुरु हरिकृष्ण जी गद्दी पर बैठलै, तखनी हिनको उमिर पाँच सालों के छेलै आरो जबें देह छोड़लकै, तखनी हिनी आठ साल के छेलै। यही उमरी में माय-बाबू के कतें ख्याल! आरो एकरौ सें बड़ी कें विपत्ति में समाज रों सेवा। हेने संतान तें माय-बाबू साथें देश-दुनिया लें सूरज बनी जाय छै।”

“काका!” बंटु काका के ध्यान अपनों दिस खींचतें कहलें छेलै, “डुबकी हाथी बड़ी जोर सें गुरगुरैलौं।” बंटु के बात सुनी काका आरो तेतरी एक्के दाफी खिलखिलाय पड़लै आरो पंचु-बंटु ई देखी कें भौचक कि है बातो पर दोनो हेना कें हँसी कैन्हें पड़लै?

“की बोललें, बंटु—हाथी गुरगुराय रहलो छै। हाथी गुरगुराय छै कि चिग्घाड़ै छै? खैर, तोहें ठीक याद दिलैलैं। देखें, गुरु जी के बारे में कहतें-कहतें हम्मं डुबकी कें एकदम्मे भूली गेलों छेलियै। फेनु तोरों बाबुओ बासा पर आवीकें तोरों सिनी के बाट जोहतें होतौ। चल लौटै

छियै। कथा कहतें-कहतें देखें हमरा सिनी कटियामो तांय आवी गेलों छियै।” आरो ई कही कें काकां बैलगाड़ी कें घुमाय लेलें छेलै।

गाड़ी के घुमते काकां पैनों सें दोनो बैल के पुड्डों छूलें छेलै, ते गाड़ी पहिलका सें तेज दौड़ें लगलें छेलै। गाड़ी हाँकतें बंटु के नाम लैकें काकां फेनु कहलें छेलै, “बंटु, याद रहलौ, हाथी गुरगुराय के जग्घा में की करै छै?”

“चिग्घाड़ै छै।” सब्भे एक्के बारगी बोललें छेलै।

“तें, ठीक छै, तोरों सिनी कें आबें एक हेनों कविता सुनाय छियौ कि कोन जानवर, कोन पंछी केना-केना बोलै छै। सुनभैं?”

आरो जबें सब्भे पहिलके नाँखी एक्के साथे ‘हों’ कहलकै, तें काकाहों एक दाफी खकसतें हुएँ कहना शुरू करलकै :

उल्लू तें घुघुआवै छै,
मुर्गा बाँग लगावै छै।
हिनहिनावै घोड़ा छै,
गड़-गड़-गड़-गड़ सौढ़ा छै।
मूसों करै छै चूँ-चूँ-चूँ,
कुत्ता भूकै भूँ-भूँ-भूँ।
भले कबूतर गुटरू-गूँ,
कुत्ता बच्चा कूँ-कूँ-कूँ।
बेंग सिनी टरवि छै,
बाघ मतुर गुरवि छै।
सिंह दहाड़ै बड़ा गजब,
झिंगुर झन-झन जेना अजब।
गदहा रेंकै रेंकले जाय,
बकरी संग भेंड़ा मिमियाय।
सुग्गा रटै छै टें-टें-टें,
बत्तख जेना कें-कें-कें।
बैल डकारै, गाय रंभावै,
मक्खी भिन-भिन करलें आवै।
चिग्घाड़ै हाथी की जोर,

कूजै वन-वन बल्लख-मोर ।
 कानै गीदड़, साँप फुँकारै,
 कौआ काँव-काँव गल्लों चीरै ।
 बिल्ली मौसी बोलै म्याऊँ,
 नै पूड़ी, तें मूसे खाँव ।

काकां पशु-पक्षी के बोली के नाम बोलै वक्ती ओकरे रँ किसिम-किसिम के बोलिये नै के नाम बोलै रहलौ छेलै, किसिम-किसिम के ठोर बनाय साथें अंगुरियो सिनी कें चमकाय छेलै, जे देखी रही-रही कें तीनो खिलखिलाय उठै । कविता खतम होलै कि तेतरी बोललै, “काका, ई कविता याद करी कें तें हम्मैं टोला भरी के सखी कें मात दै देवे। तोहें हमरों सिलोटी पर नै लिखी देभौ!”

“एकदम लिखी देभौ। कल पहलें यही काम करना छै।”

“अच्छा काका, ई बाज कोन चिडियाँ होय छै जै तें गुरु जी आरो बादशाह के आदमी के बीच गुत्थमगुत्थी होय गेलै?”

“पंचु आरो बंटु, तोरहौ सिनी कें कुछ पूछना छै?” काकां घूमी कें दोनो सें पुछलें छेलै।

“काका, गुरु हरिसिंह अपनों सेना में खाली घोड़े कैन्हें रखै। की लड़ाय में हाथी काम नै आवै छै, जबकि हाथी घोड़ा से बेसिये मजबूत होय छै।”

“की सुन्दर सवाल करलैं पंचु। बंटु तहूँ कुछ पूछ—जों मनो में कुछ शंका छै। कल पहलें सबके जवाबे देना छै। आय तें बेरे बहुत होय गेलै, नै तें अइये सब सवालौ के जवाब दै देतियौ। हौं वहाँ देखें, के आवी रहलौ छै।”

“ऊ तें गणेशी काका छेकै।” तीनो हर्षित होतें बोललै।

“आरो काका के हाथो में कुछ दिखावै भी छै, बंटु?”

“हाथों में एक झोला छै आरो-आरो हों, दोसरों हाथों में एक बड़का ठोंगा।” बंटु तड़ाक सें जवाब देलें छेलै कि कहीं कोय पहले नै बोली दै ।

“बतावें पारैं कि वैंमें की होतै?” काकाँ तुरत पुछलें छेलै ।

“है केना कोय जानतै।” पंचू कहलकै ।

“हम्मं बताय छियौ, झोला में बौंसी के मूरी-घुंघनी भरलौं छै आरो ठोंगा मे घोडमारा के पेड़ा! हों !”

ई सुनथैं तेतरी खुशी के मारे खुली गेलौं मुँहो पर दोनो तरत्थी रखी लेलकै आरो पंचु-बंटु के खुशी तें देखथैं बनै छेलै। गदगदी के जेना कोय ठिकाने नै रहैं।

“तेतरी, एक बात जानै छैं—सुक्खा घुँघनी गुरु गोविन्द राय कें बड़ी पसन्द छेलै।” काकां कहलकै ।

“है गुरु गोविन्द जी के छेलै?” हिनकों बारे में तें नै बतैलौ, काका?”

“नै बतैलें छियौं, तें जानी ले। हिनी दशमों गुरु छेलै। हौ जे हरिकृष्ण जीं ज्योति में मिलै सें पहले कहलें छेलै—गुरु बाबा बकाले। जाने छै ऊ गुरु के छेलै—नौमो गुरु तेगबहादुर सिंह। तखनी तांय बकाले आक्रमण आरो उपद्रव के कारण सुरक्षित नै रही गेलौं छेलै, से हुनी वहाँ सें हटी के मारीबाल नाम के एक गाँव खरीदी, वहीं नानकी चक्क बसैलकै—जे बाद में आनन्द साहिब कहलैलै। अच्छा पंचु, तोहें बतावें पारें हरगोविन्द जी के छेलै?” काकां पंचु के पीठ सहलैतें पुछलकै ।

“गुरु जी छेलै।”

“ठीक कहलैं। सिक्ख पंथ के छठमों गुरु आरो गुरु तेगबहादुर सिंह हिनके बेटा छेले—सिक्ख पंथ के नौमों गुरु। तें आनन्दपुर साहिब सें हिनी अपनी माय आरो कनियैन के साथ पूरब राज्य में यात्रा लेली निकली गेलै। आगरा, इलाहाबाद, बनारस आरो गया होतें गुरु तेगबहादुर पटना पहुँचलै, जहाँ हिनी अपनी कनियैन कें सिक्ख संरक्षण में रखी आपने बंगाल, आसाम, ढाका तक गेलै, जहँ हुनका मालूम होलै कि हुनका बेटा होलौं छै, ते सीधे पटना लौटी ऐलै।”

“तें, काका वहूँ ठां गुरुद्वारा होतै? तेतरी बोललै ।

“छै नी। पटना साहिब के नाम सें विख्यात छै। पटनाहै में गुरु तेगबहादुर जीं अपनौ बेटा के नाम गोविन्द राय रखलकै आरो जबें हिनका मालूम होलै कि कश्मीर के पंडित सिनी पर औरंगजेब अत्याचार करी रहलौं छै, तें हिनी गोविन्द राय कें लैकें आनन्दपुर साहिब चल्लौं ऐलै। वहीं सें औरंगजेब के अत्याचार कें रोकै लें हिनका दिल्ली जाना

छेलै। बात कुछवो हुए पारें छेलै, से हुनी अपनों बेटा कें गुरुगद्दी पर आसीन करलकै। तखनी गोविन्द राय के उमिरे की छेलै—मात्र नौ साल के छेलै। जानें छैं, तेतरी, नवे साल में गुरु गोविन्द सिंह कौन-कौन भाषा के विद्वान होय गेलों छेलै?”

“कौन-कौन?”

“संस्कृत, फारसी, गुरुमुखी के। एतन्है नै, हथियारो सिनी चलावै में हिनी पारंगत होय गेलों छेलै। जानै छैं, हिनी उच्च कोटि के कवि छेलै। हिनी खाली गुरुमुखीये में नै, फारसी आरो ब्रजभाषाओ में कविता लिखलें छै, ई भाषा सिनी के तें तोरासिनी अभी नामो नै सुनलें होभैं। कविसिनी सें हिनका एतन्हैं संगत छेलै कि हिनकों दरबार में बावन कवि के जमावड़ा बनले रहै। गुरु गोविन्द जीं ही खालसा पंथ रों नीव रखलें छेलै। खालसा मानी बुझलैं, बंटु? एकरों मानी होलै शुद्ध। आरो सिक्ख पंथ के अनुयायी लें पाँच चीज के होना जरूरी करी देलकै। जानै छैं ऊ की-की छेकै? ऊ छेकै—केश, कंधा, कारा, कचेरा, कृपाण। कारा, कचेरा, कृपाण बुझलैं, पंचु?”

“नै।”

“कारा मानी लोहा के बनलों कड़ा, कचेरा मानी कच्छा आरो कृपाण मानी बड़ों छूरी रं छोटों तलवार। बाद में पिताहै नाँखी न्याय के रक्षा करतें हिनियो नादेड़ में अपनों देह छोड़ी देलकै। ई नादेड़ कहाँ छै, तेतरी बेटा—जानै छैं? ई महाराष्ट्र में गोदावरी नदी के किनारा में बसलों शहर छेकै। एक बात आरो जानी ले, नादेड़ में जे सचखंड गुरुद्वारा छै—हौ महाराजा रणजीत सिंह के कहला पर हुनके मित्र सिकन्दर जाह, मीर अकबर अली खान, आसिफ जाह तेसरों नें बनवैलें छेलै। बस नादेड़ हजूर साहिब सचखंड गुरुद्वाराहै अभी तांय नै जावें पारलों छियै। पटना साहिब में ते दू-दू दाफी माथों टेकी ऐलों छियै लेकिन नादेड़ भी जाना छै आरो होलै तें यहा साल। जाय के मॉन तें केरल के हरिपल्ली गजमेलाहौ करै छै, मतर नै जैवै। बाप रे, बाप, तखनी दक्खिन भारत में की गरमी पड़ै छै, चैत खतम हुए पर रहै छै आरो बैशाख शुरू, यानी फरवरी-मार्च के महीना, ऊ मेला में हाथी तें खूब सजैलों जाय छै, पचास-पचास सजैलों हाथी के पैरेड, किसिम-किसिम के पाँच रं बाजा, मतर हौ गरमी में जे रं

हाथी सिनी परेशान होय जाय छै, ओकरो दिस केकरो की ध्याना जाय छै? यही लेली मॉन रहलौं, हुन्ने मॉन नै जाय छै । तोरा सिनी जानिये गेलौं छैं—हाथी केँ कत्ते गरमी लगै छै । आदमी कत्ते बेरहम होलौं जाय रहलौं छै! जे हाथी केँ हमरो पुरखें गणेश जी समझी पूजतें रहलै, आय ओकरहै बकरा-पाठा समझै छै; धरती पर विनाश फूटै वाला छै; फुटिये रहलौं छै!” काका केँ लगलै कि बातों सें हुनी भटकी रहलौं छै, तें बात बदलै के खयालों सें हुनी झट सना एकटा फेंकड़ा पढ़लकै :

कत्तो अच्छा आलूदम
पेट बचाय केँ कम्मे कम
ढम्मक ढम,
ढम्मक ढम।

कि तखनिये डुबकी के फेनु जोरदार शंखवाला आवाज होलै।

“तें एकरों मतलब छै कि डुबकी हमरा सिनी केँ देखी लेलें छै। जखनी हमरासिनी चललियै—तखनी तें ई घोर नीनों में छेलै।”

“नीनों में कहाँ छेलै, काका। ऊ तें एकदम शांत ठाढ़ों छेलै।”

“यहा तें नै बुझवैं, जबें हाथी इस्थिर-शांत ठाढ़ों दिखें, तें समझी ले कि ऊ झपकी लै रहलौं छै। एतन्है नै, ऊ खड़े-खड़ चार घंटा तांय झपकी लिये पारें। हमरा सिनी केँ बासा सें चलो दू घंटा सें बेसी होय चलो छै आरो डुबकी घंटा भरी पहिले सें झपकी लै रहलौं छेलै। चल, हमरो सिनी बासा तें पहुँचीये गेलियै। हड़बड़ाय केँ नै उतरना छै।”

मतुर काका के कहला सें की, गाड़ी के रुकना छेलै कि पहले बंटु ओकरो पीछू पंचु हेनो कुदकी केँ नीचे ऐलै; जेना दू गज के ऊँच्चों दीवारी सें धाँस देलें रहें। मतर तेतरी तब तांय नै उतरलै, जब तांय नीचे उतरी केँ काका ओकरा उतारी नै देलकै।

तीनो के नीचे उतरना छेलै कि सब उछल्लों-कुदलों बासा लुग पहुँची गेलै, जैठां गणेशी काका अभियो दोनो हाथों में झोला आरो ठोंगा होन्है लेलें चौकी पर गोड़ लटकैलें बैठलौं छेलै। बैलों के घंटी के आवाज सुनथैं मँहगीयो धड़फड़ाय केँ उठी गेलै, उठलौं तें छेवे करलै, भले डुबकी के चिग्घाडवो सुनी केँ जामुनी गाछी के नीचे आँख बंद करलै ओघरैले रहलै । घंटी के आवाज सुनलकै तें उठी बैठलै; गमछी झाड़लकै आरो

गणेशी लुग आवी गेलै ।

बैल आरो गाडी कें ओकरो-ओकरो जग्घा पर पहुँचाय कें जबें काका लौटलौं छेलै, तें हुनी छोटों-छोटों छों केला-पत्ता काटलें ऐलौं छेलै—एकदम धोलों-धालों, साफ-सुथरा। नगीच आवी कें चौकी पर छवो केला-पत्ता ई कहतें हुएँ बिछाय देलें छेलै, “आबें बुझलैं नी गनेसी कि हमरों बाबू कैंहिने एतें बड़ों चौकी बनवैलें छेलै कि वखत-कुवखत दसो आदमी एक्के चौकी पर बैठें सके।” फेनु गणेशी दिस देखते कहले छेलै, “आबें इंतजार कथी के। बस लंगर शुरू। सब पत्ता पर मूरी-घुघनी हिसाबे सें दै दें। खाली ख्याल रहे कि एक्को अन्न बर्बाद नै जाय। अन्न तें भगवान समान होय छै, देह के रक्षा करैवाला। आरो पेड़ावाला ठोंगा हौ दिस रखी दें। हौ तेतरी के घोर जैतै।”

सब कुछ होनै कें होलौं छेलै, जेना-जेना काकां कहलें छेलै। काकां हाथ में कुछ अन्न उठाय कें आँख बंद करी कें कुछ बुदबुदैलौं छेलै आरो जबें हुनी मुँहों में ऊ कौर देलें छेलै, तें तेतरी, बंटु, पंचुओ के हाथ दनादन मूरी-घुँघनी सानै पर लगी गेलौं छेलै। एक अजीब भितरिया होइ तीनो में चली गेलौं छेलै कि पहिलें के मूरी-घुँघनी ओरावें पारें। काका, मेंहगी, गणेशी के हँसी रुकें नै पारले जबें तीनो के सिसुऐवों-खैवों साथे-साथ चलें लगलौं छेलै।

॥ दस ॥

“की दादा, आय देखै छियौं खादी के गंजी-धोती के जग्या में सिलिक के कुर्ता आरो साफ-दगदग दगदग धोती पिन्ही कें बैठलौं होलौं छौ। कोय बाहरी आदमीयो आवैवाला छै की?” दस कदम दूरे सें मेंहगी पुछलें छेलै आरो बाबू कें पिछुऐतै आवी रहलौं तेतरी, बंटु-पंचु एक्केक करीकें काका के अगले-बगल पालथी मारी चौकी पर बैठी गेलौं छेलै।

“देखै नै छैं—आय केन्हों तीनो जमी कें हमरा सें सवाल करै लें

बैठलौं छै। आय हमरों परीक्षा छेकै, तें साफ-सुथरा लिबासे में नी आना छेलै। जों तोरों मनो में कोय किसिम के सवाल छौ, मँहगी, तें आय तहूँ पूछें पारें। आय हमरों परीक्षा होय जाय कि हम्में कतें जानै छियै आरो कतें नै। तें, सबसे पहिलें बंटू बोलें—तोरो की सवाल छेकौ?” काका बैठले-बैठले पीठ सीधा-सीधा बोललै ।

“जे कल्हो पुछलें छेलियौं कि बाज कोन चिड़ियाँ होय छै, जेकरों कारण गुरुजी आरो बादशाह के आदमी आपस में भिड़ी गेलै?” बंटू झट सना बोललै।

“तोरों सवाल, पंचु?”

“गुरु तेगबहादुर जी घोड़े कैन्हें लानै के बात कैन्हें करै? की घोड़ा-हाथी सें ऊ बेसी ताकतवर होय छै? हुनी भुजलौं घुंघनी कहाँ से मँगावै छेलै?”

“ठीक छै। आबें तोरा की पूछना छौ, तेतरी ? पूछ!” काकां तेतरी के माथा पर हाथ रखतें बोललै।

“काका, तोरों एत्तें उमिर होय गेलौं आरो डुबकियो के। तहियो तोहें एत्तें काम करै छौ आरो डुबकी अभियो रोज दू-तीन कोस चली लै छै—थक्कै नै छौ?”

तेतरी के सवाल सुनी कें काकां हँसतें हुएँ कहलकै, “थकतें तें डुबकियो होतै आरो हम्मू थकीये जाय छियै, मतर जिनगी बैठै लें थोड़े होय छै, नानकी। हाथी आरो मरद बैठलौं, कि गेलौं।...अच्छा मँहगी, आय तहूँ कुछ हमरा सें पूछें, आयको चौपाल यही सब में बीतें!” काका के चेहरा पर चमक आय बेसिये छेलै ।

“हम्मै की पुछवौं दादा! जों पुछनाहै छै, तें ई बतावों—की तहूँ बच्चा में शैतानी करै छेलौ। यें तीनो तें माय कें परेशान-परेशान करी मारै छै।”

“आबें तें केकरौ कुछ नै नी पुछना छै? तें, हम्मै एकेक करी कें सबके उत्तर दै छियौ। पहिलें तें बंटु के सवाल के उत्तर। हेनाकें तें चील भी शिकारी पक्षी होय छै मतर बाज सें बड़ी कें नै। होन्हौ कें चील के माथे नै, लोलो छोटों होय छै, जबकि बाज के दोनो चीज बड़ों। पक्षी में बाज चीते-रं धरती पर दौड़ें पारें आरो सरंग सें घासों में बैठलौं बगरों

तक कें देखी लिएं पारें; हेनों आँख तेज होय छै! एकरों मोटों-मोटों टांग एहै मजगूत होय छै कि बकरी के बच्चो पंजा में लैकें उड़ें पारें।” काकां दोनो हाथ आरो मूड़ी ऊपर करतें कहलें छेलै ।

“बाप रे बाप!” तेतरी कें जना कँपकँपी लगी गेलों रहें ।

“कटियो टा गलत नै कही रहलौ छियौं। बाज कें तोहें पिंजड़ा में बंद रखै नै पारों; पिंजड़ा तोड़ी कें बाहर आवी जाय छै आरो नै तें ई केकरो पकड़लौं शिकारे के खाय छै। पक्षी में शेर समझें।” बाज कभियो एक जग्घा में घासला बनाय कें नै रहें आरो कि जो हवा दक्खिन दिशा सें आवी रहलौं छै, तें उत्तर दिश नै उड़तै। हवाहै दिस मुँह करी दखिने दिस उड़तै—तहीं सें तें गुरु गोविन्द सिंह प्रतीक रूपो में बाज अपनों पास रखै छेलै।”

“ओ, ई बात छै ।” तेतरी बोललै ।

“एकरों बारे में आरो बात जानें। एकरों सिर में टेढ़ों लोल आरो पंख बढ़तें-बढ़तें एतें बढ़ी जाय छै कि नै तें यें शिकार करें पारै छै, नै बेसी ऊपर उड़ै पारै छै।”

“आय ! तबें?” तेतरीं फेनु पुछलें छेलै।

“तबें वैं पत्थर पर चोंच पटकी-पटकी कें लोल तोड़ी लै छै आरो अपने लोलों सें पंखो सिनी के नोची लै छै। ताकि शिकार करें पारें, उड़ें पारें।”

सुनथै तेतरी फेनु सिहरी उठलै और पुछलकै, “काका, हेनों करै वक्ती दरद नै करतें होतै?”

“की कहै छैं, दरद नै करतें होतै। एकदम कलपित्तों होय जैतै होतै मतर हेनों नै करतै, तें भूखे नै मरी जैतै। आबें पंचु तोरों सवाल के उत्तर। सब ध्यान लगाय कें सुनियो। है तें देखले सें कोय कहें पारें कि हाथी घोड़ा सें बेसी बरियो होय छै मतर घोड़ा हेनों फुर्तीला आरो छलांग लगावैवाला नै हुएँ पारें; कभियो नै हुएँ पारें। एकरा हम्मैं इतिहास के दू-तीन घटना सें समझाय के कोशिश करै छियौ। तोरा सिनी सिकन्दर के नाम तें सुनलें होभैं?”

“हों, बहुत बड़ों विजेता छेलै, जे राजा पुरु कें हराय देलें छेलै।”

“मार्थो हरैतै। ई सब विदेशी लेखक के बदमाशी छेकै। कहलौं

तें यहू जाय छै कि ऊ एक हरियानवी बहादुर के कटार सें हेनोँ घायल होलै कि गांधार में ही ओकरों कहीं पर मौत होय गेलै। लेकिन बात यहाँ हाथी के ताकत के छै, तें कै लेखक यहू लिखै छै, कि जबें राजा पुरु कें बंदी बनाय लेलकै, तें मगध यानी पटना के राजा धनानंद सिकन्दर के सम्मान लेली अस्सी हजार घुड़सवार आरो सत्तर हजार विध्वंशक हाथी लैकें तैयार छेलै। तें एकरा सें पता चलै छै कि युद्ध लेली हाथी विध्वंश करै वास्तें तें एक्के हाथी काफी होय छै। किताबो में लिखलौं छै कि महात्मा बुद्ध के चचेरों भाय देवदत्त बुद्ध सें बड़ी दुश्मनी राखै छेलै आरो मगध के राजा अजातशत्रु ओकरों प्रिय मित्र छेलै। ओकरै से एक विध्वंशक हाथी लैकें ओकरा ताड़ी पिलचैलकै, जैसेँ ऊ आरो उमताय गेलै। बुद्ध जन्ने सें आवी रहलौं छेलै, वही रस्ता के लोगों कें खुचलें-खाचलें बुद्ध दिस बढ़लै।”

“हाय बाबू! तबें की होलै?” पुछला के बाद एक पल लेली तेतरी के मुँह खुल्ले रही गेलै ।

“होतै की, कुछ नै । बुद्ध कें देखथें हाथी नेंगड़ी हिलावें लगलै। बुद्ध हेनोँ-तेन्होँ महात्मा थोड़े छेलै; भगवान कहावै छै। जे भी हुएँ। आबें तोही सोचें, जबें पटना के राजा के पास ओत्तें घुड़सवार आरो ओत्तें हाथी छेलै, तें जे राजा पुरु के राज सिंधु आरो झेलम तक विस्तृत छेलै, ओकरों सेना में कत्तें हाथी होतै! लड़ाय के तें लंबा कहानी छै। इखनी एतन्है समझें कि सिकन्दर के पास अरेबियन घोड़ा के संख्या बेसी छेलै, जेकरा पर बैठलौं सैनिक फुर्ती सें हिन्ने-हुन्ने सें तीर चलाना शुरू करी देलकै, तें पुरु के हाथी सिनी के बीच भगदड़ मची गेलै; नै तें जे रं हाथी सिकन्दर के सेना कें मूली, गाजर नाँखी गोड़ों सें भरता बनाना शुरू करलें छेलै कि मत पूछें। यही बात कें समझतें हुएँ महाराणा प्रताप हाथी पर सें नै, अपनों चेतक घोड़ा पर सवार होय कें हल्दीघाटी में लड़ाय लड़ी रहलौं छेलै। अकबर बादशाह दिस सें मान सिंह हाथी पर सवार छेलै आरो राणा प्रताप अपनों चेतक घोड़ा पर। बतैलियो नी, घोड़ा फुर्तीला होय छै, से महाराणा के चेतक घोड़ा छलांग मारी कें मानसिंह के हाथी के माथा तक चल्लौं ऐलै आरो राणा प्रताप के आक्रमण सें मान सिंह धड़ाम सें नीचें गिरी पड़लै।” ई बात कें काकां अपनों जाँघ पर जोर के

पंजा बजाइतें कहलें छेलै, फेनु एक पल रुकतें कहना शुरू करलकै, “हेना कें राणा प्रताप के पास चेतक घोड़े नाँखी एक हाथियो छेलै, जेकरों जिकिर नै होय छै। जेना घोड़ा के नाम चेतक छेलै, होनै कें हाथी के नाम छेलै—रामप्रसाद। ऊ हाथी पर कोय पिलवान नै होय छेलै। हल्दीघाटी के भीषण लड़ाय में अकबर के सेना नें ओकरों बहादुरी देखले छेलै। पचहत्तर-अस्सी सेर के हथियार ओकरों शरीर सें बंधलौ रहै। किताब में लिखलौ छै, वै हल्दीघाटी के लड़ाय में तेरह हाथी कें अकेले मारी देलें छेलै। होना कें जंगलो में कोय हाथी हाथी पर जल्दी आक्रमण नै करै छै। बड़ी मुश्किल सें अकबर के सेना नें प्रताप के ऊ हाथी के बांधें पारलकै। ये वास्तें सात हाथी पर दू-दू पिलवान बैठलै आरो चारो दिस सें ओकरा घेरलौ गेलै। तबें ऊ बंदी होलै। मतुर देखों ऊ हाथी के स्वामीभक्ति! अठारो दिन तांय अकबर के बहुत चाहला के बादो मुँहों में एक खौर नै रखलकै—अत्याचारो सहै लें पड़लै आरो सतरह दिन बाद ऊ गिरलै, तें फेनु उठें नै पारलै।”

कनौजिया काका के एतना बोलना छेलै कि तेतरी, पंचु, बंटु के नजर डुबकी दिस चल्लौ गेलै, जे मजा सें सूँढ़ उठाय कें आमी गाछी के ठार तोड़ै में मशगूल छेलै।

“हाथी बहुत संवेदनशील होय छै।” काकां आगू के बात शुरू करतें बोललै, “खाली अपने मालिके के प्रति नै, अपनों परिवार के आरो हाथी वास्तें भी। देखलौ गेलौ छै, जंगल में जों दल के कोय हाथी मरी जाय छै, तें सब वहाँ पर इकट्ठा होय कें शोक मनाय छै। खैर, हम्में तोरासिनी कें बताय रहलौ छेलियौं कि हाथी कत्तो मजबूत हुएँ, घोड़ा नाँखी फुर्तीला नै हुएँ पारें। जानै छैं, जखनी हल्दीघाटी के लड़ाय-मैदान में राणा प्रताप दुश्मन सें घिरी गेलै, तखनी चेतक घोड़ा छब्बीस फीट चौड़ा नाला कें छड़पी गेलौ छेलै, जे देखी कें दुश्मन सेना कें मिरगी आवी गेलै आरो की ! तखनी चेतक पर कवच, भाला-तलवार लैकें हथियारों के भार दू सौ सेर सें कम तें नहिये छेलै। चार मनौ सें कुछ बेसिये समझें। तहियो वैं छलांग मारी देलकै। ई काम की हाथी करें पारतियै? यही सें गुरु तेगबहादुर सिंह सिर्फ घोड़ाहै के माँग रखलें छेलै। फेनु यहू बात छेलै कि औरंगजेब के ई आदेश छेलै कि बादशाह के आदमी छोड़ी

कें कोय घोड़सवारी नै करें पारें। एकरो गुरु जी कें गुस्सा छेलै।”

“काका, तोहें कत्तें-कत्तें बात जानै छौ। कौनी इस्कूलो में पढ़लौं छेलौ?” पूछै वक्ती तेतरी के चेहरा रही-रही कें चमकी जाय।

“जॉन इस्कूली में तोरासिनी पढ़ी रहलौं छौ। खाली मॉन लगाय कें पढ़ना छै। माउन्टेसरी इस्कूली में पढ़तियै, तें माउन्ट सें ससरी कें टांग-गोड़ तोड़ी लेतियै। सब जानतियै, खाली घरे के बात नै...हों, तें पंचु के एक आरो छोटकुनिया सवाल। गुरु गोविन्द जी के घुंघनी कहाँ सें आवै छेलै? तोहे की बुझै छैं—बौंसी आकि हंसडीहा से हुनकों वास्ते घुंघनी आवै छेलै। पटनाहै के राजा फतहचंद सेनी आरो हुनकी रानी, गोविन्द राय कें बेटाहै नाँखी मानै छेलै आरो हुनकै कन जाय के रोजे तललौं चना के घुंघनी खाय छेलै, हुनी।”

“ओ!” संतोख के स्वर में पंचु बोललै।

“तें, आबें रही गेलै तेतरी के सवाल। एकरों जवाब तें एक कथा सें ही दिँ पारौं। मॉन लगाय कें सुनियें—कौशल राज के कहानी छेकै। तखनी भगवान बुद्ध कहीं कौशल राजे में घूमी-घूमी उपदेश दै रहलौं छेलै। वही समय में वहाँ एक बड्डी बलवान हाथी छेलै, जेकरों नाम बुद्धरेक छेलै।” आरो कथा रोकी कें पुछलें छेलै, “की नाम छेलै?”

तें एक्के साथ तीनो जोर सें बोललौं छेलै “बुद्धरेक।” तेतरी, पंचु, बंटु साथे मँहगियो हौले सें बोललौं छेलै, “बुद्धरेक।”

“तें, बुद्धरेक कत्तें-कत्तें युद्ध में दुश्मन कें भागै लें लाचार करी देलें छेलै। जेन्हें युद्ध के मैदान में सिंघी आरो नगाड़ा बजै कि बुद्धरेक के माथा पर निसाँव चढ़ी जाय आरो दुश्मन कें सूँढ़ो में लपेटी-लपेटी गेंदे नाँखी उछालें लगै। समय बितलै; वहीं हाथी एक दाफी कोय दलदली पोखर में फँसी गेलै। राजां जे ओकरा बहुत मानै छेलै, कत्तें-कत्तें महावत कें लगैलकै—ओकरा ऊ पोखर सें निकालै लें मतर सब बेकार। आखिर में राजा ऊ हाथी के पुरनका पिलवान के खोजारी करवैलके, जे भगवान बुद्ध के भक्ति में रहें लगलौं छेलै।

“जबे भगवान बुद्ध कें सब बात मालूम होलै, तें हुनी ऊ पिलवान कें कहलकै कि तोहें अभिये जायकें हाथी कें दलदल सें निकालौं। जबें भगवान के आदेश होलै, तें ऊ वहाँ से पोखर दिस निकली

गेलै। कहाँ जाय के देखै छै कि बुद्धरेक भरी टाँग दलदल मे धँसलौं होलौं छै, जे देखी केँ ऊ महावत जोर सेँ ठहाका मारी केँ हँसी पड़लै।”

“ऊ कैन्हें काका?” तेतरी टोकलें छेलै।

“आगू सुन नी। ऊ पिलवान जानै छेलै कि केना हाथी में जोश भरलौं जावें सकें छै, से वैं नगाड़ा-सिंघी बजावैवाला केँ बोलैलकै आरो जोर-जोर सेँ नगाड़ा-सिंघी बजावै लें कहलकै। हुन्नें नगाड़ा-सिंघी के बजना छलै कि हिन्नें बुद्धरेक पोखरी के दलदल सेँ बाहर निकली जोर-जोर सेँ चिंघाड़ें लगलै। कैन्हें कि नगाड़ा आरनी के आवाज सुनथैं ऊ उमताय जाय। ओकरा नै अपनों कमजोर देह के ख्याल रहै, नै कमजोरी के—बस वहा-रं; जेनाकि तोरासिनी के साथ हँसतें-बोलतें हमरा नै अपनों बुढ़पा के ख्याल रहै छै, नै अपनों कमजोरी आकि थकान के। जानै छै; कोयल कुहू-कहू बोलै छै—तभिये आम पकी के मीट्टो होय छै। हमरौं जिनगी में मिठास आरो उमंग के कारण तें तोरेसिनी के हँसी-ठिठोलीये नी छेकै, नानकी!”

“अच्छा काका, तोहें हमरा नानकी कैन्हें कहै छौ?”

“थैलें कि तोरो जनम ननिहर में होलौं छौ। ननिहर में जनमैवाला नानक आरो जनमैवाली नानकी!” काकां जोर से चुटकी बजैतें कहलें छेलै।

“तें, गुरु नानक देव नानाहै घरों में जनम लेलें होतै।” तेतरी लगले पुछलकै।

“बस हेने बुझें। गुरु नानक के बहिन के नाम नानकी छेलै, कैन्हें कि वहू नानिये घरों में जनमलौं छेली।”

“आबें समझी गेलियै, काका।” कही के तेतरी सीधा होयकेँ बैठी गेलै।

“आबें आखरी में ऊ, जे तोरों बाबू पुछलें छौ।” काकां तेतरी के माथा पर हाथ रखतें कहलकै आरो बिना कुछ कहले ठाय केँ हँसी पड़लै। रुकलै, तें बोललै, “आबें तोरासिनी पुछवें कि कैन्हें हँसलौ ? ऊ बाते हेनौं छै कि बिना हँसलें हम्मे रहै नै पारौं। आबें तोरासिनी सुनें—तखनी हम्मे तेतरी सेँ बस कुछ बड़ो होवै; कत्तो कम, तें नौ-दस साल के जरूरे। बुद्धि में तेतरीये-रं पाकलौं!”

ई सुनी कें तेतरीं दोनो भाय दिस देखतें भीतरे-भीतर भरी मूँ हँसलों छेलै ।

“तें हम्में की कही रहलों छेलियै कि तखनी हम्में नौ-दस साल के जरुरे होभै। बाबू पुरैनियाँ में नौकरी करै छेलै आरो हफ्ते-हफ्ते हुनी जबें घोर आवै, तें सबकें एकेक इकन्नी दै।” ई कही कें कनौजिया काका फेनु ठहाका मारी कें हँसी पड़लों छेलै; हँसी थमलै, तें फेनु सें कहना शुरू करलकै; “हम्मै पाँच भाय-बहिन छेलियै यानी चार बहिन में एकलौता हम्मै, भाय। पैसा हेनो चीज छेकै कि माँगला पर तें देतियै नै, से हम्मै चारो बहिन सें अलग-अलग कहलियै—हम्मै अपनो इकन्नी जबें माँटी में रोपी देलियै आरो आठे रोजों के बाद खोदी कें देखलियै, तें वैठां झुक्को-झुक्को इकन्नी फरी गेलों छै। तोरो सिनी ये-ये ठियां माँटी में गाड़ी दै; फेनु एक इकन्नी के बदला दस-दस इकन्नी फरी जैतौ। बहिन तें बहिने होय छै; हमरो बात पर विश्वास करी अपनो-अपनो इकन्नी वहाँ-वहाँ गाड़ी देलकै। गाड़लें छेलै हमरे सामना, से राती चुपचाप वहाँ जायकें चारो इकन्नी निकाली कें खट्टो भत्ती देलियै। छों दिन तांय बाजार में हमरो खूब मूरी-धुंघनी चलतें रहलै। जबें बाबू ऐलै, तें बहिन सिनी बतेलकै कि जल्दिये ओकरासिनी कें एक इकन्नी के बदला ढेरे इकन्नी मिलैवाला छै आरो हमरो बुद्धियो वारे में सब बात बतेलकै। सुनथैं बाबू के गोस्सा सीधे मगजों पर चढ़िये तें गेलै । माँटी खोदलों गेलै मतर वै ठियां कुछ होतियै तबें नी!”

ई कही कें काकां अपनो एड़िया पर घाव के लंबा चेन्हों देखैतें बोललों छेलै, “हौ दिन बाबू सें जे मार पड़लों छेलै कि पैसाताला गाछ के नामे सें डोर लगें लागै।” कनौजिया काका के ई कथा सुनी कें पंचु, बंटु, तेतरी जे भीतरे-भीतर हँसी रहलों छेलै; मार खाय के बात सुनी कें खुली कें हँसी पड़लै।

कि तखनिये डुबकी सूँड़ कें, साँपो के फन नाँखी उठाय कें शंख वाला आवाज करलकै, जे सुनी काकां कहलकै, “देखैं, डुबकी के भी हँसी आवी गेलै आरो मँहगी तोहें भीतरेभीतर मुस्की रहलो छैं; लालशाही-रं। ठीक छै, ठीक छै। आय तोरो सिनी वास्तें कजरेली सें पच्चीस ठो लालशाही मँगवलें छियै। पूरे घर लेली आरो घरे जाय कें खाना छै। फेनु

कल से तें तोरो सिनी के इस्कूलो खुली रहलौ छै। मतुर जबें मॉन करौ, जखनी मॉन करौ, आवी जइयें। आरो हों, लालशाही खाय के जरुरे बतैयें कि ई बेसी मजेदार लगलौ कि पैसा रों गाछ रोपैवाला हमरों बुद्धि।” ई कही के कनौजिया काका फेनु अपनों जोर के हँसी नै रोके पारलकै । बंदू, पंचु, तेतरी आरो मँहगी के निकलला के बादो काका के सौंसे देह पुरानों बातों के याद से गुदगुदैतें रहलै।”

